



BILTEN

OPĆINE SREBRENİK



CERTIFIKAT ISO 9001:2000
BROJ: 155865



IZDAJE: OPĆINA SREBRENİK • DVOBROJ: 42 i 43 • MJESEC: NOVEMBAR/STUDENI 2013. • BILTEN JE BESPLATAN • TIRAŽ



Rekonstruisana ulica Maršala Tita

SADRŽAJ

- 1 Naslovna stranica
- 2 Obilježen 1. mart, Dan nezavisnosti BiH
- 3 21. godišnjice ABiH, Štaba TO i Dobrovoljačke čete Srebrenik
- 4 Obilježen 9. maj, Dan pobjede nad fašizmom
- 5 Spomen obilježje u Dedićima; 21. godišnjica „Puti spasa“
- 6 Sastanak načelnika sa Dr. Denisom Bećirovićem i Huseinom Kavazovićem
- 7 Izvještaj sa 4. i 5. sjednice OV-a Srebrenik
- 8 Izvještaj sa 6. i vanredne sjednice OV-a Srebrenik
- 9 Izvještaj sa 7. i 8. sjednice OV-a Srebrenik
- 10 Izvještaj sa 7. i 8. sjednice OV-a Srebrenik
- 11 Posjeta općine Sjenica; Općina Srebrenik na 4. SBF-u
- 12 Ozvaničen početak radova na novoj zgradi općine Srebrenik
- 13 Posjeta općine Radlje ob Dravi; Posjeta jordanskih biznismena
- 14 3E u Srebreniku; Moguća nova ulaganja; Solarna energija
- 15 Rekonstrukcija gradskog poligona i Ul. Maršala Tita
- 16 Izlož.-prodajni salon „Herceg“; Posjete Zaharexu i Tempolastu
- 17 Dani otpora 2013
- 18 21. juni, Dan općine Srebrenik
- 19 21. juni, Dan općine Srebrenik
- 20 Poplava u Srebreniku; Srebreničani osvojili Maglić
- 21 1. mart, Dan civilne zaštite BiH
- 22 Vježba „Snaga odgovora 2013“ Humane aktivnosti policije
- 23 Vijesti iz kulture
- 24 Vijesti iz kulture
- 25 Vijesti iz kulture
- 26 Vijesti iz kulture
- 27 Vijesti iz kulture
- 28 Vijesti iz kulture
- 29 Vijesti iz kulture
- 30 Vijesti iz kulture
- 31 Panorama
- 32 Panorama
- 33 Panorama
- 34 Panorama
- 35 Vijesti iz sporta
- 36 Vijesti iz sporta

NAPOMENA: Bilten obuhvata vijesti u periodu od 1. marta do 1. septembra 2013. godine.



S polaganja cvijeća na spomen-kosturnicu

Na svečan način obilježen 1. mart, Dan nezavisnosti BiH

U Plavoj sali Doma kulture u Srebreniku, 28.02.2013. g. održana je svečana sjednica Općinskog vijeća, kojom je na prigodan način obilježen 1. mart, Dan nezavisnosti Bosne i Hercegovine. Ovoj manifestaciji prisustvovali su vijećnici OV-a Srebrenik, te predstavnici vjerskih zajednica, boračkih udruženja, privrednih kolektiva, javnih ustanova i preduzeća te predstavnici medija s područja srebreničke općine i TK-a. U sklopu obilježavanja ovog značajnog datuma, delegacija Općine Srebrenik i boračkih udruženja je prvo položila cvijeće na spomen-obilježja poginulim borcima s područja općine Srebrenik



Načelnik Buljubašić: -Podsjetio na hiljadugodišnju historiju BiH

u odbrambeno-oslobodilačkom ratu 1992-1995.g i narodno-oslobodilačkom ratu 1941-1945.g., te minutom šutnje odnosno učenjem Fatihe, odala počast našim najboljim sinovima. Poslije intoniranja himne Bosne i Hercegovine, predsjedavajuća OV-a Srebrenik Vesna Veselić je upoznala prisutne sa dnevnim redom svečane sjednice, nakon čega su učenici Prve OŠ Srebrenik odrecitovali pjesmu o Bosni. Načelnik općine Srebrenik Sanel Buljubašić je podnio prigodni referat, u kojem je prisutne upoznao sa hiljadugodišnjom historijom Bosne te između ostalog kazao: - Trenutak je i da se podsjetimo na Ustav SR BiH iz 1974 godine, kojim je BiH imala veliku autonomiju i gdje je definisana kao država svih njenih građana i naroda: Muslimana, Srba i Hrvata.



Detalj sa Svečane sjednice

To je bio i osnov za kasnije proglašenje nezavisnosti svih republika bivše Jugoslavije. Danas obilježavamo jedan od najvažnijih datuma u višestoljetnoj historiji BiH. To je dan kad je BiH, prije 21 godine, voljom preko 66 posto svojih građana koji su glasali za to da BiH bude nezavisna država svih njenih građana i ravnopravnih naroda, postala nezavisna i suverena država i kao takva priznata od međunarodne zajednice. Od tog dana je započeo hod po mukama BiH kao suverene i samostalne države zbog stalnih napada i sa istoka i sa zapada a paralelno s tim traje i borba za njeno očuvanje, što nam slijedi i u budućnosti. Međutim, i pored svega,



Nastup učenika Prve OŠ Srebrenik

moramo svi zajedno graditi BiH, poštovati svoje sunarodnjake i odlučivati o svojoj sudbini. Ne smijemo pokleknuti i nadamo se da će pobijediti oni koji istinski doživljavaju ovu zemlju kao svoju-kazao je Buljubašić. U nastavku programa učenici Prve OŠ Srebrenik su se predstavili prigodnim kulturno-umjetničkim programom.

U Srebreniku obilježena 21. godišnjica ABiH

Dana 15.04.2013.g u Srebreniku je na svečan način obilježena 21. godišnjica formiranja Armije BiH. Predstavnici izvršne i zakonodavne vlasti Općine Srebrenik, predstavnici boračkih organizacija, porodica šehida, bivši borci kao i ostali građani, prisjetili su se vrlo važnih dana za opstojnost BiH i njenih naroda. Položeni su vijenci sa cvijećem na Centralno spomen-obilježje na trgu Alije Izetbegovića, i na spomen-kosturnici pripadnicima NOR-a (1941-1945), nakon čega je održana svečana akademija u povodu 21-e godišnjice formiranja ABiH. Ovom prilikom gostima se obratio ratni komandant 21. srebreničke brigade Abdurahman Fazlić, koji je kazao: -U svijetu je Armija BiH, u ratnim vremenima, predstavljena kao „čudo bosanskog otpora“, s obzirom da smo nesporni uspjeli da se odbranimo od, po mnogima, pete vojne sile u Evropi, čijih je, od ukupno 17, čak 11 korpusa bila stacionirano u BiH. JNA zadojena četničkom ideologijom željela je da potpuno okupira BiH, a njene narode koji nisu Srbi odvede u nestanak, prije svega bošnjački narod. Tada su prvi otpor pružili „Patriotska liga“, „Teritorijalna odbrana“, „HVO“, „Zelene beretke“..., koje su kasnije uglavnom sve dovedene



Detalj sa svečane akademije

pod jednu, združenu komandu Armije BiH i to 15. aprila 1992. godine, zbog čega smo i dužni vječno obilježavati ovaj dan, kazao je Fazlić na prigodnoj akademiji.

21. godišnjica formiranja Dobrovoljačke čete



Proučena je fatiha i položeni vijenci sa cvijećem na Centralno spomen-obilježje

Svečanim postrojanjem na gradskom šetalištu ispred centralnog šehidskog spomen-obilježja u Srebreniku, na prigodan način je obilježena 21. godišnjica formiranja Dobrovoljačke čete. Kako je istaknuto na prigodnoj svečanosti, ova jedinica formirana je odmah na početku agresije na BiH, a u njen sastav su ušle istinske patriote koji su svoju požrtvovanost i hrabrost iskazali na ratištima širom BiH. -„Formirana je sredinom aprila 1992. godine, a većina njenih pripadnika još u septembru 1991. godine među prvima se uključila u Patriotsku ligu BiH. U početku je brojala svega 20-ak boraca, a nakon rasplamsavanja ratnih djestva, njihov broj se povećao za četiri puta. Na linijama odbrane u Smoluci, Gradačcu, Brčkom i Čelici, te na ratištima širom BiH 15 najhrabrijih pripadnika Dobrovoljačke čete dalo je svoje živote za odbranu BiH“, istakao je Seid Odobašić, ratni komandir jednog od odjeljenja Dobrovoljačke čete Srebrenik. Polaganjem vijenaca sa cvijećem na šehidsko spomen-obilježje i učenjem fatihe odata je dužna počast poginulim braniteljima, nakon čega je u planinarskom domu „Lipici“ na planini Majevici održano prigodno druženje pripadnika ove jedinice.

21. godišnjica formiranja Štaba TO Srebrenik



Na Lipicima je upriličeno prigodno druženje bivših boraca i organizatora otpora

U organizaciji Općinske službe za boračko-invalidsku zaštitu općine Srebrenik i srebreničkih boračkih udruženja, na gradskom šetalištu ispred Centralnog spomen-obilježja održana je prigodna svečanost kojom je obilježena 21. godišnjica formiranja Štaba TO Srebrenik. Pred velikim brojem okupljenih organizatora otpora i bivših boraca, na prve dana organizovanog otpora naroda ovog kraja agresiji na BiH podsjetio je Fadil Vikalo, ratni komandant Štaba TO Srebrenik. -„Zahvaljujući činjenici da smo na vrijeme prepoznali nadolazeću opasnost, već početkom aprila 1992. godine, na osnovu naredbe Predsjedništva BiH, formirali smo Štab TO Srebrenik, pod čiju su komandu odmah stavljene sve do tada formirane dobrovoljačke jedinice. Organizirali smo se najbolje što smo mogli, želeći da sačuvamo integritet države BiH i zajedništvo svih njenih naroda, u čemu smo, zahvaljujući brojnim patriotama, u potpunosti i uspjeli“, poručio je Vikalo. U sklopu obilježavanja ove godišnjice, delegacija boračkih udruženja i ratnog Štaba TO Srebrenik položila je vijence na Centralno spomen-obilježje u centru Srebrenika. Nakon toga, u planinarskom domu „Lipici“ na samom vrhu planine Majevice upriličeno je druženje bivših boraca i organizatora otpora agresiji na BiH s područja općine Srebrenik.

U Srebreniku obilježen 9. maj, Dan pobjede na fašizmu



Svečano otvorenje obnovljene spomen-kosturnice

Zlo fašizma teško može zauvijek biti poraženo, ali svakako da se protiv njega trebamo boriti na svakom koraku. Sve vjere, kulture i nacije trebaju da budu ujedinjene protiv ovog zla. Srebrenik ima tradiciju multi-etičnosti i na svu sreću odupro je se da ne postane dio zločina u prošlim teškim vremenima, kada je bio na iskušenju, a što se to nije desilo, najveća zasluga pripada našim Sinovima Bosne, koji su u herojskoj i pravednoj borbi dali svoje živote, da mi danas možemo mirno da živimo u BiH. Posebno su neki govornici potencirali da je ovo vrijeme brojnih teških krivotvorenja historije i fašizma iz perioda Drugog svjetskog rata. No time neće biti poništeno zlo koje su fašisti izazvali, predvodili, legitimirali i simbolizirali. U okviru sve-

Centralna manifestacija obilježavanja 9. maja, Dana pobjede nad fašizmom i Dana Evrope, na nivou Tuzlanskog kantona, je održana u Srebreniku. Prema protokolu od strane predstavnika izvršne i zakonodavne vlasti općine Srebrenik te predstavnika UABNOR-a Srebrenik te SABNOR-a TK i SABNOR-a BiH prvo je položeno cvijeće i vijenci na Centralno spomen-obilježje na Trgu Alije Izetbegovića, a zatim i na obnovljenu spomen-kosturnicu pripadnicima NOR-a 1941-1945.godine, nakon čega je, u 11,30 sati u prepunoj Kino sali Doma kulture, uslijedila svečana akademija. Prisutnima se, pozdravnim riječima, prvo obratio predsjednik Udruženja antifašista općine Srebrenik Vladimir Ilić, a o značaju ovog datuma govorili su i načelnik općine Srebrenik Sanel Buljubašić, predsjednik SABNOR-a TK Božo Novaković te prof. dr. Josip Baotić, predsjednik SABNOR-a BiH. Svi su u svojim izlaganjima podsjetili da se isti dan obilježava i kao Dan Evrope i kao Dan ljljana, što je svojevrsna simbolika, obzirom da su se naši nabolji sinovi i kćeri u odbrambeno - oslobodi- lačkom ratu 1992-1995. g., toliko godi- na nakon 1945. g., borili protiv preživjelog fašizma i na ovim našim prostorima.

čane akademije upriličen je i prigodan kulturno-zabavni program u sklopu kojeg je, od strane glumaca iz Tuzle, izveden poetsko-scenski recital „Bosnom zemlja kad se zove“ autora književnika Zlatka Dukića, dok su se članovi KUD-a „Mehmed Ibrahimović“ iz Srebrenika predstavili splotom igara koje potiču sa područja zemalja bivše Jugoslavije.



Predstavnici UABNOR-a Srebrenik polažu vijenac na spomen-kosturnicu



Predstavnici SABNOR-a TK i BiH polažu vijenac na Centralno spomen-obilježje

Između ostalog su istakli i da je fašizam poput korova – on raste tamo gdje mu je pogodno tlo, a pogodno tlo za fašizam su slaba država i slaba privrženost građana toj državi. Korov, kako znamo, moramo stalno iznova uništavati jer je veoma otporan, te tako moramo postupati i prema pojavama fašizma na ovim prostorima.



Detalj sa svečane akademije održane povodom 9. maja, Dana pobjede nad fašizmom

Otkriveno spomen-obilježje u naselju Dedići

Dana 19.06.2013.g u 14 sati svečano je otvoreno šehidsko spomen-obilježje u MZ Dedići. Uz brojne goste, prisutnim majkama, sestrama, očevima, braći..., koji su brisali suze prisjećajući se svojih najmilijih, obratio se načelnik općine Srebrenik, Buljubašić Sanel, koji je između ostalog kazao: - Ovo spomen-obilježje je najmanje što smo mogli učiniti u spomen ovih hrabrih ljudi iz Dedića, koji su položili svoje mlade živote, kako bismo mi danas slobodno koračali našom domovinom. Općina Srebrenik je pomagala i pomagaće i ubuduće slične akcije u MZ-a i neka ovo spomen-obilježje bude jedan mali znak naše zahvalnosti ali i opomena svima nama za ubuduće-istakao je načelnik Buljubašić. Prisutnima se obratio i ratni komandant 211. oslobodilačke brigade Salihović Ibrahim, koji se prisjetio hrabrosti boraca iz Dedića, od kojih su neki, nažalost, u toj borbi položili svoje mlade živote te izrazio nadu da će se i ubuduće nastaviti pomagati porodice poginulih boraca i šehida. Nakon uvodnog govora spomen-obilježje su zajednički otkrili načelnik Buljubašić, ratni komandant Salihović, predsjednik MZ Dedići Ibrišimović Fikret te djeca poginulih boraca Avdić Amela i Dedić Nermin. U nastavku programa Ibrišimović Fikret je istakao da je izgradnja spomen obilježja koštala oko 14.200 KM. -„Sama izgradnja je trajala nešto duže ali zahvaljujući sredstvima mještana Dedića u iznosu od 6000



Detalj sa otkrivanja spomen-obilježja u MZ Dedići

KM te zahvaljujući izvršnoj i zakonodavnoj vlasti Srebrenika, koji su obezbijedili 2.000 KM, i Ministarstvu za boračka pitanja u Vladi TK-a, koji su obezbijedili 6.200 KM, uspješno smo završili izgradnju ovog spomen-obilježja, te na taj način dokazali da ne zaboravljamo svoje najbolje sinove"-istakao je Ibrišimović

Obilježena 21. godišnjica izgradnje Puta spasa od Srebrenika, preko Rašljana do Brčkog



Detalj sa manifestacije

Na lokalitetu Lipici, na samom vrhu planine Majevice kod Srebrenika, održana je centralna manifestacija obilježavanja 21. godišnjice izgradnje „Put spasa“ Srebrenik-Rašljani-Brčko. Riječ je o planinskoj putnoj komunikaciji koja je u ratnom periodu predstavljala jedinu vezu slobodnih brčanskih teritorija s ostalim općinama tadašnjeg tuzlanskog okruga i slobodnim dijelovima BiH. Prigodnoj svečanosti prisustvovali su predstavnici vlasti i boračkih udruženja Brčkog i Srebrenika, te planinari i brojni učenici osnovnih škola iz Brčko Distrikta. O izgradnji „Put spasa“ i njegovom značaju za odbranu slobodne brčanske i čeličke teritorije na skupu su govorili Abdulah Zildžović, ratni načelnik inženjerije 108., odnosno 215. Viteške motorizovane brigade Brčko, Mehmed Barjektarević, predsjednik ratnog Predsjedništva općine Srebrenik, Esed Kadrić, dogradonačelnik Brčko Distrikta i Zihir Suljić, zamjenik predsjedavajuće OV-a Srebrenik. Za izgradnju desetak kilometara puta, rečeno je na svečanosti, bile su zadužene inženjerske jedinice štabova TO Srebrenik i Brčkog, a nova putna komunikacija od Lipika do Rašljana, u dužini od 10 kilometara, u jeku najžešćih ratnih dejstava, predstavljala je spas za stanovništvo Brčkog i Čelića. Naime, zahvaljujući izgradnji puta preko planinskog prevoja Majevice, jedinicama koje su branile slobodnu teritoriju Brčkog i Čelića bila je omogućena dostava hrane i materijalno-tehničkih sredstava, a osigurani su i preduvjeti za evakuaciju ranje-

nika i civilnog stanovništva iz opkoljene slobodne brčanske teritorije. Prema riječima učesnika iz rata između ostalog se spominje da je ovo bio jedini način da se pomogne brčanskim borcima i civilima koji su bili u potpunom okruženju i da su svi zajednički prva tri mjeseca radili maksimalno, naročito prvih tridesetak dana, u jako teškim uslovima, kako bi prošli ovaj put, kojim je spašen život mnogih ranjenika, iskreno priznajući da je zbog tadašnje loše komunikacije veliki broj ranjenika nažalost izgubio živote probijajući se kroz blato i majevičke šume. U sklopu svečanosti, predstavnici vlasti i boračkih organizacija općine Srebrenik i Distrikta Brčko položili su cvijeće na spomen-ploču izgrađenu prošle godine na Lipicima, koji trajno podsjećaju na nadljudske napore pripadnika Armije RBiH, koji su početkom maja 1992. godine na nepristupačnom



Počast su odali i predstavnici općine Srebrenik

nepristupačnom terenu planine Majevice, u rekordno kratkom vremenu, izgradili novu putnu komunikaciju. U sklopu priredbe za obilježavanje 21. godišnjice postavljene su i mermerne ploče oko, prošle godine postavljene, spomen-ploče te uređen okoliš. Nakon centralne manifestacije za sve učesnike je obezbijeđen ručak u Planinarskom domu Lipik, gdje je održan i prigodni čas historije, na kojem je Abdulah Zildžović mladima prenio svoje iskustvo iz tog ratnog perioda i govorio o značaju kako puta tako i ovog datuma za historiju Brčkog i Srebrenika, nakon čega su učesnici iz Brčko Distrikta pješice prešli ovu putnu komunikaciju od Lipika do Rašljana.

Dr. Denis Bećirović posjetio općinu Srebrenik

Dana 31.05.2013. godine u zvaničnoj posjeti općini Srebrenik, boravio je Dr. Denis Bećirović, predsjedavajući Predstavničkog doma Parlamentarne Skupštine Bosne i Hercegovine. Dr. Bećirović je po ponovnom preuzimanju ove značajne funkcije, za svoju prvu službenu posjetu odabrao općinu Srebrenik. Uglednog gosta su primili općinski načelnik Sanel Buljubašić, predsjedavajuća OV-a Srebrenik Vesna Veselčić i zamjenik predsjedavajuće OV-a Srebrenik Zihher Suljić. Načelnik općine Srebrenik Buljubašić Sanel se uvaženom gostu zahvalio na dolasku i posjeti, predstavivši ukratko općinu Srebrenik kao i njeno funkcionisanje i rad u ovim teškim vremenima. Posebno je istakao neke od projekata koje općina Srebrenik realizuje, kao što je izgradnja nove zgrade općine, čija je predračunska vrijednost oko 4,5 miliona KM i čiji temelji su već iskopani, revitalizaciju tvrđave Gradina i našega Starog grada, kao i projekat hidro akumulacije "Bistrička rijeka" koju planiramo graditi na planini Majevidi i koja je strateški projekat za našu Općinu i njene stanovnike, a čijom realizacijom bi dugoročno bio riješen problem snabdijevanja pitkom vodom. Revitalizacija i ponovno otvaranje rudnika kamenog uglja u Jasenici je takođe jedan od strateških projekata općine Srebrenik, a koji bi se u skoroj budućnosti trebao realizovati uz pomoć stranih



Detalj sa susreta u kabinetu načelnika

investitora. Dr. Bećirović je obećao svoju nesebičnu pomoć u promociji općine Srebrenik i njenih projekata, kako u BiH tako i u inostranstvu. Na kraju susreta načelnik Buljubašić, zajedno sa predstavnicima OV-a Srebrenik, se uvaženom gostu zahvalio na dolasku i posjeti dok je Bećirović zahvalio domaćinu na toplom prijemu te najavio mogućnost nove posjete općini Srebrenik.

Načelnik općine Srebrenik Sanel Buljubašić posjetio u Sarajevu Reis-ul-ulemu Husein ef. Kavazovića



Načelnik Buljubašić Sanel i Reis-ul-ulema Husein ef. Kavazović

Dana 21.05.2013. godine, načelnik općine Srebrenik Sanel Buljubašić posjetio je u Sarajevu Reis-ul-ulemu Husein ef. Kavazovića. U ugodnom i prijatnom razgovoru sa Reis-ul-ulemom Husein ef. Kavazovićem, načelnik Buljubašić je ukratko predstavio općinu Srebrenik, kao i planove i projekte koje planira realizovati u narednom periodu. Istaknut je početak gradnje nove zgrade općine Srebrenik čiji temelji su već iskopani a predračunska vrijednost ovog projekta iznosi oko 4,5 miliona KM, kao i završne aktivnosti oko projektovanja i skorašnji početak izgradnje i nove gradske džamije u Srebreniku. Naše dovište na Ratišu je, a kako je to istakao i sam Reis Kavazović, jedinstveno u Bosni i Hercegovini po tome što se u periodu od 6. maja pa do 2. augusta (do Aliduna), svakoga ponedjeljka, održavaju

molitve i upućuju dove Uzvišenom Allahu dž.š. Ovo dovište zasluhuje poseban tretman u svakom pogledu, a rekonstrukcija i asfaltiranje pristupnih puteva koji iz pravca tri općine (Lukavca, Gračanice i Srebrenika) vode do ovog mjesta treba da bude jedan od prioriteta u narednom periodu, iako je tokom razgovora istaknuto da i izgradnja potrebnih i pratećih objekata koji nedostaju, kao i uređenje okoliša na ovom dovištu, takođe treba da bude reralizovana što prije. Ovo je jedinstvena prilika za našu Općinu i za ovaj kraj, da razvija i vjerski turizama, koji sve više dobija na značaju, a iz godine u godinu sve više ljudi i vjernika iz cijele BiH pa iz inostranstva posjećuje ovo mjesto i borave na našem području. Reis Kavazović je i emotivno vezan za Srebrenik, jer je kao mladi svršnik Gazi Husrev Begove Medrese u Sarajevu, osamdesetih godina, boravio i službovao u džematu Gornji Srebrenik, gdje ga i danas stariji ljudi pamte kao dragog i vrlo prijatnog mladog imama,

čovjeka i efendiju, a i ponose se što je njihov nekadašnji imam danas uvaženi Reis-ul-ulema Islamske zajednice BiH. Na kraju je istaknuto da je Srebrenik uvijek kroz historiju bio svijetli primjer jedinstva muslimana, ali i suživota, tolerancije i dobrosusjedskih odnosa sa pripadnicima drugih konfesija, koji vole Srebrenik i Bosnu i Hercegovinu. Načelnik Buljubašić se zahvalio Reis-ul-ulemi na toplom prijemu i ugodnom razgovoru i pozvao ga da čim prije posjeti Srebrenik. Reis Kavazović se načelniku Buljubašiću zahvalio na posjeti i obećao da će uskoro doći u, njemu uvijek dragi, Srebrenik, u koji je, kako reče, uvijek često svraćao, uz njegovu poruku i uputu da samo zajedno, kroz razgovore i dogovore, uz puno međusobno uvažavanje i toleranciju, moramo i možemo graditi i izgrađivati i sami sebe ali i našu lijepu domovinu Bosnu i Hercegovinu.

Izvještaj sa 4. sjednice Općinskog vijeća Srebrenik

Na 4. sjednici Općinskog vijeća Srebrenik koja je održana posljednjeg dana februara 2013. godine, usvojena je Odluka o pristupanju izradi izmjena i dopuna Regulacionog plana Centra Srebrenika do 2023. godine, gdje su zadržane ranije granice. Znači sa istočne strane je magistralni put Tuzla-Županja, sa južne ulice Maka Dizdara, 25. novembra do željezničke pruge Brčko-Banovići sa zapadne strane, te sa sjeverne do Fačkinog potoka. Usvojena je i Odluka o izmjenama i dopunama administrativnih taksi, gdje je taksa za stambeno-poslovni objekat do 150m² snižena sa 80 KM na 70 KM a taksa za poslovne objekte do 150 m² je snižena sa 120 KM na 70 KM, dok je usvojena i Odluka da je od javnog interesa izgradnja saobraćajnice lijevom stranom rijeke Tinje u naselju Bare i to od mosta za bazene do planiranog mosta na Slanjanskoj rijeci. Bez veće rasprave vijećnici su usvojili i Odluku o prosječnoj konačnoj građevinskoj cijeni kvadratnog metra stambene površine u visini od 850 KM, a zatim je usvojen i Program rada Općinskog vijeća te Općinskog načelnika za 2013. godinu. Prihvaćen je i novi Statut JZU „Dom zdravlja“ Srebrenik, koji je usklađen sa novim Zakonom o zdravstvenoj zaštiti, dok je tačka o raspodjeli novčanih sredstava iz budžeta, a koja se odnosi na finansiranje političkih stranaka u Općinskom vijeću skinuta s Dnevnog reda. Na ovoj sjednici imenovano je i nekoliko komisija i to Komisija za rješavanje žalbi protiv prvostepenih rješenja u upravnim stvarima koju čine: Samed Mehmedović (predsjednik- SDP), Dijana Sofić (član- NSRzB) i Emina Đozić (član-SDA). U Komisiju za zaštitu nacionalnih manjina imenovani su: Edis Selimović (predsjednik NSRzB), Ljiljana Hodžić (član SDP), Željko Novaković (član HDZ) i Samir Šabuljić (član SDA). Komisiju za nadzor rada čine: Selver Salkić (predsjednik SDA), Vahidin Ibrahimović (član SBB) i Admir Hodžić (član SBiH). U Komisiji za odlikovanje i općinska priznanja su: Agan Husetović (predsjednik SDP), Ibrahim Dedić (član BPS) i Muhamed Joldić (član SDA). Tri člana Komisije za zaštitu i unapređenje čovjekove okoline su: Selma Muharemović (predsjednik SBiH), Nedžad Sofić (član NSRzB) i Nirmel



Detalj sa 4. sjednice Općinskog vijeća Srebrenik

Muratović (član SDA). Petočlanu Komisiju za pitanja mladih čine: Edisa Joldić (predsjednik SDA), Merima Glotić (član SBB), Armin Bajraktarević (član SBiH), Ilda Husarić (član SDP) i Nermin Mujkanović (član BPS). U Komisiju za dodjelu građevinskog zemljišta imenovani su: Amra Nurkanović (predsjednik SBB), Halim Hodžić (član SBiH), Hidajet Husić (član SDP), Emir Sofić (NSRzB) i Mevludin Velić (član SDA), dok će se, zbog nepotpunih prijedloga, članovi komisije za vjerske zajednice, ravnopravnost spolova, mandatno-imunitetsku komisiju za utvrđivanje prometne vrijednosti i nekretnina i etičku komisiju imenovati na narednoj sjednici OV-a. Na ovoj sjednici usvojene su informacije o inspeksijskom nadzoru za 2012. godinu, zatim o stanju zaštite od požara i vatrogastvu, o dobrovoljnom darivanju krvi te o stanju vodosnadbijevanja, koje će uz rješavanje sanitarne deponije biti prioritet u 2013. godini. Prihvaćena je inicijativa o novoj reorganizaciji u okviru Fabrike obuće „Aida“ d.d. Tuzla, zatim Nacrt Zakona o izmjenama i dopunama Zakona o cestovnom prometu na području TK kao i Nacrt Zakona o izmjenama i dopunama Zakona o prostornom uređenju i građenju.

Izvještaj sa 5. sjednice Općinskog vijeća Srebrenik

Na 5. sjednici OV-a Srebrenik, koja je održana 28.03.2012.g., usvojen je budžet Općine za 2013. godinu i to u iznosu od 10.775.000 KM. Na gotovo na svim budžetskim pozicijama došlo je do umanjjenja od 5% u odnosu na prethodnu godinu, s obzirom da je prošla godina okončana u deficitu od 2,5 miliona KM, koji će se namirivati u narednih pet godina, a u ovoj godini za njegovo „pokrivanje“ izdvojiti će se 300.000 KM. Skidanjem s Dnevnog reda tačke o osnivanju novog Javnog preduzeća koje bi brinulo o toplifikaciji, parkinzima i javnoj rasvjeti, a posebno tačke o izgradnji nove komunalne deponije u Potpeću, činilo se kako neće biti rasprave o komunalnoj deponiji. No međutim, Informacija o problematiki deponovanja komunalnog otpada izazvala je najveću raspravu, gdje je istaknuto kako se deponija u Babunovićima zatvara krajem aprila i da se do tada mora iznaći rješenje. Tako je zadužen Nadzorni odbor JKP „9. septembar“ da sagleda sve mogućnosti kako i na koji način bi se odvio otpad na druge općine (Tuzla, Zenica ili Bijeljina) a paralelno s tim da načelnik Općine sa službama te kolegijem Općinskog vijeća predloži nove lokacije na području općine Srebrenik. Prihvaćen je i Program izgradnje infrastrukture na području općine Srebrenik za 2013.godinu, gdje je planirano investiranje 2,8 miliona KM i to najviše u kapitalna ulaganja, koja se odnose na toplifikaciju centra grada odnosno vodosnadbijevanje Dubokog Potoka, Tinje i Podorašja. Usvojen je i Program uređenja gradskog građevinskog zemljišta za 2013. godinu u iznosu od 2.354.000 KM, kao i Izmjena i dopuna odluke o komunalnim taksama. U nacrtu su usvojeni i zoning planovi o poslovnim zonama u Špionici, a do konačnog usvajanja vjerovatno će



Detalj sa 5. sjednice OV-a Srebrenik

pretrpjeti i određene izmjene, što će privrednim subjektima omogućiti bolje preduslove za razvoj privrede na našem općinskom području. Prihvaćen je i Izvještaj o procijenjenim štetama od prirodnih i drugih nesreća u 2012. godini u iznosu od 556.432 KM, od čega je čak 415.857 KM pričinjeno na poljoprivrednim dobrima. Također, u formi nacrtu je usvojena i Odluka o dimnjačarskoj djelatnosti, gdje su, između ostalog, predviđene i visoke novčane kazne, kako za pravna tako i za fizička lica, u slučaju neprovođenja ove odluke.

Izvještaj sa 6. sjednice Općinskog vijeća Srebrenik

Nakon više od četiri sata rasprave na 6. sjednici Općinskog vijeća Srebrenik nisu prihvaćene prvobitno predložene lokacije za deponovanje otpada i to: „Krčevine-Gele“, zatim „Tinja-Gornja-Klanci“ te „Drenik-kamenolom“, pa je formirana komisija sastavljena od svih političkih partija koje participiraju u Općinskom vijeću, koja će u saradnji sa općinskim službama i načelnikom Općine pokušati u narednim danima iznaći nova rješenja, s obzirom da je krajnji rok za deponovanje otpada u Babunovićima kraj aprila 2013. godine. Ova Komisija će sagledati stanje na cijelom općinskom području te predložiti moguću lokaciju kao i benefite onoj mjesnoj zajednici koja bude bila najbliža budućoj deponiji. Također, vijećnici nisu prihvatili ni poskupljenje cijene odvoza smeća, zbog eventualnog odvoza smeća u druge općine i to na deponiju u Bijeljini u Zenicu, prije svega što bi odvoz otpada bio 183% skuplji, dok s druge strane JKP „9. septembar“ sa trenutnim zastarjelim voznim parkom to i nije u stanju da uradi, pa se sve nade u rješavanje nastalog problema polažu u to kako će se, u narednim danima, ipak pronaći nova lokacija na području općine Srebrenik. U nastavku sjednice prihvaćena je Informacija o stanju bezbjednosti na području općine Srebrenik u 2012.godini, gdje je stanje bezbjednosti generalno ocijenjeno kao zadovoljavajuće, obzirom da se broj krivičnih djela smanjio u odnosu na 2011.godinu za 124 slučaja, a i šteta, nastala ovim krivičnim djelima, u odnosu na prethodnu godinu je smanjena za 45,13%. Vijećnici su prihvatili i Izvještaj o radu Općinskog pravobranilaštva, gdje je istaknuto kako su ukupna potraživanja Općine Srebrenik 394.132,70 KM, a potraživanja fizičkih i pravnih lica od Općine iznose 3.449.894,60 KM, dok je ukupan dug pravnih i fizičkih lica prema Općini Srebrenik 409.406,16 KM. U Izvještaju o radu JU „Centar za socijalni rad“ Srebrenik istaknuto da je u 2012.godini ukupno 5.075 građana općine



Detalj sa 6. sjednice Općinskog vijeća Srebrenik

Srebrenik koristilo razne vidove socijalne zaštite ili oko 12% ukupnog stanovništva, a među njima je najviše onih koji su dobijali dječiji dodatak i to 1.942 korisnika. Zahvaljujući pomoći u rješavanju stambenog pitanja socijalno ugroženih kategorija u 2012.godini zbrinuto je 11 porodica, koje su dobile pomoć u rasponu od 500 – 2.500 KM, tako da je za ovaj program utrošeno ukupno 14.193 KM. Ono što je negativno je da je zabilježen porast nasilja u porodici i to za 8 slučajeva više u odnosu na prošlu godinu. Na Dnevnom redu su se našli i Izvještaji o radu JU „Sportsko-rekreativni centar“ Srebrenik, koji nije usvojen, te Izvještaji o radu boračkih organizacija, „Narodnog univerziteta“ i Općinskog suda u Gradačcu, koje ima odjeljenje u Srebreniku. Prihvaćena je i Odluka o davanju saglasnosti prava građenja MZ Špionica Centar na zemljištu u državnoj svojini za namjene izgradnje poligona malih sportova, a prihvaćen je i Prijedlog za imenovanje Etičke komisije gdje je za predsjednika postavljen Mustafa Buljubašić.

Izvještaj sa vanredne sjednice OV-a Srebrenik

Na vanrednoj sjednici Općinskog vijeća Srebrenik, koja je održana 14.05.2013.g. zbog problema sa odlaganjem otpada, usvojene su Odluke i Zaključci koji bi konačno mogli doprinijeti u iznalaženju nove lokacije sanitarne deponije, koja bi, po svemu sudeći, trebala biti na području MZ Seona. Novoformirana Komisija sastavljena od predstavnika svih političkih partija koje participiraju u Općinskom vijeću, te načelnika i njegovih saradnika, obavila je razgovore sa predstavnicima MZ-e Seona, a potom i izvršila anketiranje mještana Seone o izgradnji nove deponije, u kojoj se preko 80% mještana izjasnilo za sanitarnu deponiju na području Seone, uz dobijanje određenih benefita za ovu MZ-u. Nakon što je načelnik prihvatio zahtjeve iz Seone i predložio vijećnicima da ih usvoje, uz nekoliko minuta rasprave i dopune novim zaključcima, vijećnici su usvojili Odluku o davanju benefita MZ-i na čijem području će biti locirana sanitarna deponija te jednoglasno usvojili i Odluku o utvrđivanju javnog interesa za izgradnju sanitarne deponije komunalnog otpada na ovoj lokaciji, čime su stvorene sve pretpostavke da se započne sa realizacijom ovog projekta. Ono što je važno istaći ostavljena je mogućnost da se jave i druge MZ-e koje su spremne, uz ovakve ili slične benefite, da na svom području obezbijede kvalitetnu lokaciju buduće sanitarne deponije, kako bi se u budućnosti isključila mogućnost blokada pristupa deponiji iz raznoraznih razloga. Mještani MZ Seona su istakli uslov da deponija bude sanitarna i izgrađena po najvišim standardima. Bitan uslov je i da potpuno budu zaštićeni okolni vodovodi, da se svakodnevno sloj smeća prekriva zemljom, da se dezinfikuju točkovi kamiona nakon dovoza otpada, te da deponija može biti samo općinska a ne kantonalna. Mještani MZ Seone su tražili da u ovoj MZ-i budu prioritetno rješavani infrastrukturni problemi te je između ostalog istaknuto da se Seoni u ovoj godini obezbijedi priključak na vodovodnu mrežu sa besplatnim priključkom za sve mještane, da se



proširi put Dedići-Seona, da se asfaltira put Seona-Rašljeva, da se odmah po pokretanju deponije zaposle 3 NK radnika iz Seone, koji bi radili na zaštiti i očuvanju deponije, a kasnije, kada bi deponija trebala postati JP za prikupljanje, sortiranje i prodaju ekonomski isplativog otpada još 3 uposlenika sa VSS iz MZ Seona. Takođe je traženo da općina Srebrenik iz budžeta obezbijedi plaćanje potrošnje javne rasvjete u MZ Seona od 01.08.2013. g., da se u 2014.g. izgradi kanalizaciona mreža na području MZ Seona... Uz to vijećnici su prihvatili i određene zaključke, kojima se daje odobrenje načelniku Buljubašiću da može započeti realizaciju ovog projekta, da će općina Srebrenik snositi sve troškove odvoza otpada na druge deponije dok se ne izgradi nova, što trenutno na dnevnoj osnovi košta oko 1170 KM, da načelnik može potpisati Ugovor o benefitima sa MZ Seona ili pak sa drugim MZ-a u slučaju potrebe, da se obaveže JKP „9. septembar“ da će ubuduće izdvajati po 1 KM od svih plaćenih računa na račun MZ Seona, što bi trenutno iznosilo oko 6000 KM mjesečno, da i druge MZ-e, koje su u zoni obuhvata buduće deponije mogu eventualno dobiti određene benefite, te da realizacija ovog sporazuma započne 01.06.2013.g.

Izvještaj sa 7. sjednice Općinskog vijeća Srebrenik

Najveću raspravu na 7. sjednici Općinskog vijeća (OV-a) Srebrenik izazvala je tačka koja se odnosila na osnivanje novog komunalnog preduzeća koje bi se bavilo proizvodnjom i distribucijom toplotne energije, javnim parkinzima i garažama, javnom rasvjetom, održavanjem prostorija i stambenih zgrada, gradskih ulica i lokalnih cesta te signalizacijom, kao i upravljanjem gradskom autobuskom stanicom. I dok je bilo mišljenja da ove poslove mogu obavljati postojeća komunalna preduzeća, ova odluka je usvojena u formi nacrtu, a do konačnog usvajanja stručne službe trebaju vijećnicima predložiti elaborat rada preduzeća, koje bi trebalo biti samoodrživo. I ove godine odluka o utvrđivanju broja općinskih priznanja zavrijedila je značajnu pažnju vijećnika pa je nakon rasprave odlučeno da se za 21. juni, Dan općine Srebrenik dodijele 4 Plakete, 6 Povelja, 4 Humaniste godine, 8 Zahvalnica i 7 Novčanih nagrada u vrijednosti od po 250 KM, koje dodjeljuje Općinsko vijeće te 8 Zahvalnica koje dodjeljuje načelnik Općine. Vijećnici smatraju da je dodjela velikog broja priznanja umanjuje njihovu vrijednost, zbog čega je zaključeno da se ubuduće formira Komisija koja bi izradila precizne kriterije za dodjelu priznanja. Ponovo je došla na red Odluka o izmjenama i dopunama Odluke o radnom vremenu ugostiteljskih i trgovinskih objekata, a na sjednici su bili prisutni predstavnici stanara u ulici Alije Izetbegovića, koji se već duže vremena žale na preglasnu muziku iz ugostiteljskih objekata. Odluka je u nacrtu a načelnik Sanel Buljubašić je kazao da vjeruje kako će uspjeti do usvajanja konačne odluke pomiriti stavove ugostitelja i stanara, koji su najviše izloženi buci. U formi nacrtu usvojena je i Odluka o utvrđivanju kriterija za dodjelu kredita redovnim studentima do diplomskog studija i stipendija redovnim učenicima srednjih škola, kao i Informacija o prirodnoj nepogodi od popalava u periodu 11.05 – 14.05. 2013.godine, gdje je konstatovano da je pričinjena materijalna šteta u iznosu od 543.000 KM, na stambenim i pomoćnim objektima, poljoprivrednom zemljištu, putevima, mostovima, pružnim propustima... Usvojena je i Informacija o stanju u oblasti poljoprivredne proizvodnje za 2012/13. godinu na području općine Srebrenik, gdje je istaknuto kako poljoprivrednicima treba pružiti podršku stručnim savjetima jer su prepušteni sami



Detalj sa 7. sjednice Općinskog vijeća Srebrenik

sebi. Poljoprivrednici su također nezadovoljni zbog neblagovremenog donošenja Programa i Pravilnika za ostvarivanje poticajnih mjera, što će se nastaviti u narednom periodu popraviti. Vijećnici su prihvatili i Informaciju o gazdovanju lovnom područjem lovačkog društva „Majevica“ kao i njihov godišnji plan za 2013/14 godinu, te Informaciju o realizaciji aktivnosti Ugovora sa JP „Šume TK“ za sanaciju asfaltiranog dijela lokalnog puta Lisovići-Zahirovići. Načelniku Buljubašić Sanelu je data saglasnost da iz budžeta Općine Srebrenik isplati 24.000 KM na račun JP „9.septembar“, na ime troškova aktivnosti toplifikacije grada i obezbjeđenja deponije, dok su usvojene i Informacije o raspisanim konkursima za prijem državnih službenika te o raspodjeli 108.000 KM na fudbalski, košarkaški i odbojkaški klub „Gradina“. Tako je fudbalerima dodijeljeno 83.000 KM, odbojkašima 15.000 KM a košarkašima 10.000 KM. Zbog obimnog Dnevnog reda na narednoj sjednici će se razmatrati izvještaji o radu JP „Vodovod i kanalizacija“, JP „9.septembar“, JU „Centar za kulturu i informisanje“ te „Sportskog saveza“.

Izvještaj sa 8. sjednice Općinskog vijeća Srebrenik

S obzirom da prethodna 7. sjednica Općinskog vijeća Srebrenik nije završena do kraja, dana 13.06.2013.godine u 9 sati održan je nastavak 7. sjednice OV-a Srebrenik na kojoj su usvojene tačke koje se odnose na Informaciju o realizaciji sanacije lokalnog puta Lisovići-Zahirovići iz Ugovora sa JP „Šume TK“, kao i Zaključak Skupštine TK o prihvatanju inicijative poslanika Zorana Jovanovića za donošenje Zakona o izmjenama i dopunama pripadnosti javnih prihoda FBiH. U nastavku rada održana je 8. sjednica OV-a Srebrenik. Na ovoj sjednici je usvojen Regulacioni plan MZ Tinja, kao i Prijedlog odluke o njegovom sprovođenju, koji obuhvata poslovne, pomoćne, objekte za stanovanje kao i sportske objekte. Usvojen je i Lokalni ekološki akcioni plan općine Srebrenik od 2012 do 2017. godine, koji vodi ka unapređenju našeg okoliša, ali do konačnog usvajanja neophodno je da prođe i javnu raspravu koja će biti organizovana u narednom periodu. Iako je bilo dosta rasprave usvojeni su Izvještaji JZU „Dom zdravlja“, JZU „Gradska apoteka“, JP „Vodovod i kanalizacija“, JP „9.septembar“, JU „Za odgoj i obrazovanje djece predškolskog uzrasta“, JU „Centar za kulturu i informisanje“ te JP „Veterinarska stanica“. Prihvaćen je Izvještaj o radu Sportskog saveza, gdje je usaglašeno da se sredstva klubovima od posebnog značaja za općinu Srebrenik raspodijele tako što će Fudbalski klub „Gradina“ dobiti 65%, a Košarkaški i Odbojkaški klub „Gradina“ zajedno 35% sredstava. Usvojena je i Informacija o kategorizaciji cesta na području općine Srebrenik, kao i zaključak da se odobri



Detalj sa 8. sjednice OV-a Srebrenik

Općini Srebrenik dodatno finansiranje odvoza komunalnog otpada izvan općine Srebrenik za period od 09 do 28. maja u iznosu od 17.812,15 KM, dok je Informacija o gazdovanju šumama i stanju šuma na područje općine Srebrenik, skinuta s Dnevnog reda.

Izvještaj sa 9. sjednice Općinskog vijeća Srebrenik

Na 9. sjednici Općinskog vijeća Srebrenik koja je održana 04.07.2013.godine, imenovana je petočlana Popisna komisija općine Srebrenik za popis stanovništva, domaćinstava i stanova u BiH, a koju će sačinjavati Jasmin Bjelić kao predsjednik te Marko Kraljević, Nedin Mujčinović, Sanel Ibrić i Miralem Husić kao članovi. Na ovoj sjednici razmatrala se i Peticija građana Dedića, Seone, Donjih Moranjaka, Šahmera i Behrama protiv odlaganja otpada na području MZ Seona, tako da će se u narednom periodu na ovim mjesnim područjima organizovati Javna rasprava, nakon čega će biti poznato hoće li deponija biti u ovoj mjesnoj zajednici ili na nekom drugom mjestu. Vijećnici su prihvatili i Odluku o dimnjačarskoj djelatnosti, a djelatnost čišćenja mogu obavljati pravna ili fizička lica koja su registrovana za obavljanje ove djelatnosti, a za one koji se ne budu pridržavali ovih odredbi za nečišćenje dimnjaka, predviđene su novčane kazne i do 2.000 KM. Usvojena je i tačka koja je odnosi na izmjenu i dopunu utvrđivanja krite-

rija za dodjelu kredita učenicima i studentima, zatim odluka o utvrđivanju javnog interesa za izgradnju prilaznog puta u MZ Brnjičani te informacija o socijalnom statusu korisnika boračko-invalidske zaštite u 2012.godini, u kojoj je obuhvaćeno 1.753 lica. Predstavници zakonodavne vlasti Općine Srebrenik dali su općinskom načelniku saglasnost da potpiše ugovor o odgođenom plaćanju naknada na ime rente u iznosu od 67.287 KM sa firmom "Marković" d.o.o., a firmi „Gromeks" saglasnost na otuđenje nedovršenog objekta tzv. "Dom penzionera" površine 100 m². Usvojen je i konačan Izvještaj o procjeni šteta nastalih prirodnom nepogodom sredinom maja ove godine, a vrijednost procjene štete je 268.824 KM, kao i dopuna Programa izgradnje infrastrukture a koja se uglavnom odnosi na izgradnju novih vodovodnih mreža i novih puteva. Usvojeno je i imenovanje predsjednika Statutarno-pravne komisije za koga je imenovana Hasiba Mujkanović, a razriješen je dosadašnji predsjednik Muharem Bajraktarević.

Izvještaj sa 10. sjednice Općinskog vijeća Srebrenik

Na 10. sjednici Općinskog vijeća Srebrenik koja je održana 29.08.2013.godine, osim uobičajenih odgovora na vijećnička pitanja te postavljanja novih vijećničkih pitanja i inicijativa, što se realizovalo u sklopu 1 tačke dnevnog reda raspravljano je o još 14 tačaka dnevnog reda. Obzirom da je Selimović Anel (BPS) iz Tinje dobio Odluku i certifikat centralne izborne komisije o dodjeli mandata za vijećnika u Općinskom vijeću općine Srebrenik umjesto dotadašnjeg vijećnika Salihović Ibrahima, koji je imenovan za ministra za boračka pitanja u Vladi TK-a, novoizabrani vijećnik Selimović je položio Zakletvu. Nakon duže rasprave jednoglasno je usvojena Informacija o aktivnostima na dovođenju dodatnih količina vode za piće na MP Duboki Potok, Tinja i Podorađe iz raspoloživih količina vode iz "Gradskog sistema" uz zaključak da se zaduži Općinski načelnik i nadležne službe da što hitnije pristupe izradi projektne dokumentacije, po mogućnosti nivoa Glavnog projekta, magistralnog cjevovoda sa pratećim objektima, koji treba ponuditi cjelovito rješenje zahvatanja bunara B-5 i najpovoljniju varijantu transporta vode do navedenih MP-a. U sklopu Glavnog projekta projektovati i rješenje privremenog snabdijevanja vodom izgradnjom cjevovoda od rezervoara Ljenobud i Kuge do Dubokog Potoka te dalje do navedenih MP-a kao i definisati finansijsku konstrukciju i moguće izvore finansiranja za izvođenje radova u cilju prevazilaženja problema deficitnih količina vode na ovim područjima. Na sjednici je istaknuto da je budžet općine Srebrenik za prvih 6 mjeseci ove godine realizovan u iznosu od oko 3.681.000 KM, odn. 69% u odnosu na planirano, uz preneseni deficit od 2.312.000 KM iz prošle godine. Bez veće rasprave jednoglasno je usvojen Izvještaj o izvršenju budžeta općine Srebrenik za 01.01 do 30.06.2013. godine i izvještaj o troškovima tekuće budžetske rezerve Srebrenik za 01.01 do 30.06.2013. g. Jednoglasno je usvojen Prijedlog Zaključka o davanju saglasnosti na Pravilnik o unutrašnjoj organizaciji službi za upravu općine Srebrenik, Prijedlog Programa mjera zdravstvene zaštite životinja na području općine Srebrenik za 2012. g., Prijedlog Programa izmjene i dopune Programa uređenja gradskog građevinskog zemljišta za 2013. g, Prijedlog Odluke o izmjenama i dopunama Odluke o radnom vremenu u oblasti trgovine, ugostiteljstva zanatstva i uslužnih djelatnosti na području općine Srebrenik uz Zaključak da se za narednu sjednicu pripremi Odluka koja precizira rad za vjerske praznike, koji bi se ugradili u ovu Odluku, kao i Informacija o stanju iz oblasti kulture na području općine Srebrenik te Informacija o položaju raseljenih i izbjeglih lica na području općine Srebrenik. Općinsko vijeće se usaglasilo da nadležne općinske službe općine Srebrenik izdaju neophodnu dokumentaciju za



Selimović Anel iz Tinje - novi vijećnik BPS-a

poslovni prostor „Merkur“ (sadašnji MTV) sa periodom važenja do privođenja zemljišta njegovoj konačnoj namjeni, odnosno do pravosnažnosti građevinske dozvole za izgradnju budućeg građevinskog objekta na predmetnom zemljištu te je jednoglasno usvojilo Informacije u vezi sa statusom ugostiteljskih objekata: "Bollywood-M", "Paradiso N°1" i "MTV" u pogledu urbanističko-građevinske dokumentacije i obavljanja djelatnosti. Bez rasprave su usvojeni Prijedlog Zaključka o neprihvatanju ponude po pravu preče kupovine nekretnine privrednog društva d.d. „Ingram" Srebrenik, Prijedlog Zaključka o neprihvatanju prava preče kupovine nekretnine Hasanović Hanife, kćeri Mustafe iz Sarajeva, Prijedlog Zaključka o davanju saglasnosti za otuđenje nedovršenog stambenog objekta- kuće Sakić Samiru, sin Sulejmana iz Špionice a na kraju su se vijećnici očitovali o inicijativi OV-a Tuzla o izmjeni autobuskih stajališta za prigradske linije, zatraživši da se nemijenja postojeće stanje te da se stanovnicima drugih općina omogući putnički saobraćaj kao što je bio i do sada.

Delegacija Općine Sjenica boravila je u neformalnoj posjeti Općini Srebrenik

Nakon sastanka partnerskih organizacija Srbije i Bosne i Hercegovine, koji je održan krajem marta 2013.g. u Tuzli, delegacija Općine Sjenica boravila je u neformalnoj posjeti Općini Srebrenik. Delegaciju u sastavu Mustafa Baltić, predsjednik Skupštine općine Sjenica, Ismail Majo Mahmutović, šef kabineta predsjednika, te Sead Bukvić šef kancelarije lokalnog ekonomskog razvoja, dočekali su Općinski načelnik Sanel Buljubašić, zamjenik predsjedavajućeg Općinskog vijeća Srebrenik Zihir Suljić, te direktor Gradskog teatra Srebrenik Fikret Mujkić. Ovom sastanku je prethodila neposredna komunikacija između Mustafe Baltića, predsjednika Skupštine općine Sjenica i Fikreta Mujkića, direktora Gradskog teatra Srebrenik. U otvorenom, neformalnom razgovoru razmijenjeni su prijedlozi za buduću saradnju, prije svega u zajedničkom apliciranju na IPA projekte, ali i kroz privrednu, sportsku i kulturnu saradnju. Dogovorena je konkretna kulturna razmjena kroz zvanične manifestacije dvije Općine "Ljeto u Sjenici" i "OGUS" Srebrenik. Obzirom da je po struci diplomirani arheolog, Mustafa Baltić je iskazao posebno



Sastanak sa delegacijom Općine Sjenica

interesovanje za Stari grad Srebrenik i ponudio pomoć u realizaciji projekata vezanih za ovaj kulturno historijski spomenik. Gosti su nakon kratke posjete otputovali nazad, za Sjenicu, a uskoro će biti dogovorena i zvanična posjeta ove delegacije kabinetu Općinskog načelnika Sanela Buljubašića.

Delegacija općine Srebrenik učestvovala je na 4. Sarajevo Business Forumu



Naša delegacija sa uglednim biznismenima iz arapskih zemalja

Dana 17.05.2013.godine, delegacija općine Srebrenik predvođena općinskim načelnikom Buljubašić Sanelom učestvovala je na 4. Sarajevo Business Forumu (SBF), gdje je predstavila nekoliko svojih ranijih projekata, kao i novi projekat "Akumulacija Bistrička rijeka sa mini hidrocentralom na planini Majevica", kojim bi se dugoročno riješio problem snabdijevanja pitkom vodom svih stanovnika naše općine. Naša delegacija je dan ranije prisustvovala svečanoj večeri u hotelu Bristol u Sarajevu, gdje je domaćin svim učesnicima SBF bio član predsjedništva BiH, Bakir Izetbegović. Bila je to izuzetna prilika za ponovni susret sa delegacijom Saudijskog Fonda za razvoj iz Rijada, kao i sa ambasadorom Kraljevine Saudijske Arabije u BiH, ekselencijom Mohammed Althakafijem, kao i sa drugim važnim i uticajnim biznismenima iz Saudijske Arabije i Malezije. Načelnik Biljubašić se ovom prilikom sreo i sa nekoliko delegacija poslovnih ljudi iz Saudijske Arabije, Jordana i Malezije, kojima su predstavljeni privredni i turistički potencijali naše Općine i ovoga kraja Bosne i Hercegovine. Obraćanje i završnu riječ na dijelu SBF-a je imao ministar vanjskih poslova BiH, Zlatko Lagumdžija, koji se zahvalio svim prijateljima BiH iz domena biznisa i politike, istakavši prednosti i ljepote naše domovine: -„Netaknuta priroda, rudna bogatstva i resursi, vrijedni ljudi i stručni kadrovi, naši su dugoročni aduti za sigurna ulaganja i investicije u Bosnu i Hercegovinu“-istakao je Lagumdžija.

Obnovljivi izvori energije i proizvodnja zdrave hrane su dvije najinteresantnije oblasti za sigurne i profitabilne investicije. Da je općina Srebrenik i na ovom SBF imala uspješnu prezentaciju svojih potencijala i projekata, dokaz je i velika zainteresovanost potencijalnih ulagača, kao i već dogovorena posjeta privredne delegacije iz Arapske Hašemitske Kraljevine Jordan, koja će narednih dana posjetiti našu općinu. Biće to izuzetna prilika da se na licu mjesta razgovara o potencijalnim ulaganjima u razvoj poljoprivrede, proizvodnju hrane, podizanje zasada i plantaža voća, kao i još neke vrste dugoročnih ulaganja u proizvodne i prerađivačke kapacitete na području naše Općine. Načelnik Buljubašić se sreo i sa direktorom Turske agencije za saradnju i koordinaciju - TIKA, Dr. Oruč Zulkuf -om, koji je takođe obećao skori dolazak u posjetu općini Srebrenik, kako bi na licu mjesta razgovarali o saradnji naše Općine i ove izuzetno poznate turske investicione agencije. Utisci naše delegacije sa 4. SBF-a su više nego pozitivni, a konkretne ideje i projekti će, nadamo se, biti podržane od strane potencijalnih investitora, sa kojima je delegacija naše Općine razgovarala tokom SBF-u u Sarajevu. Inače posebnu pažnju prisutnih na SBF-u su privukla



Predavanje bivšeg predsjednika R. Slovenije, Danilo Turka

predavanja Mahatir bin Mohammada, ranijeg premijera Malezije, Ali Babacana, zamjenika premijera R. Turske, kao i ranijeg predsjednika R. Slovenije, Danilo Turka, koji su prenijeli svoja pozitivna iskustva i načine na koje su oni napravili ogromne iskorake u privrednom i društvenom napredku svojih zemalja u posljednjih desetak godina.

Ozvaničen početak radova na novoj zgradi administracije općine Srebrenik



Zvanični početak radova na novoj zgradi Općine Srebrenik

Dana 25.05.2013.godine, općinu Srebrenik je posjetio Ambasador Kraljevine Saudijske Arabije, nj. e. Eid Mohammed Althakafi, koji je, zajedno sa općinskim načelnikom Buljubašić Sanelom te predstavnikom Konzorcija srebreničkih firmi, svečano otkrio tablu sa osnovnim podacima o novoj zgradi općine Srebrenik, čime je ozvaničen početak radova na izgradnji navedenog objekta. Uvaženog gosta je u svom kabinetu primio općinski načelnik Buljubašić Sanel a sastanku su prisustvovali predstavnici Konzorcija srebreničkih firmi koje su dobile posao na izgradnji nove zgrade općine u Srebreniku te predsjedavajuća Općinskog vijeća (OV) Srebrenik Veselčić Vesna. Načelnik Buljubašić je uvaženom gostu ukratko predstavio općinu Srebrenik, sa svim njenim privrednim, turističkim i prirodnim potencijalima, a prije svega istakao je vrijedne i čestite ljude - stanovnike i privrednike, dok je predsjedavajuća OV-a Veselčić Vesna uvaženom gostu

troškovima kredita od 1 % i rokom otplate zajma od 25 godina, obezbijedio Saudijski Fond za razvoj iz Rijada. Rok za završetak gradnje objekta je 12 mjeseci, a kako je istakao Sulejman Herceg čija je firma "HERCEG" voditelj Konzorcija,



Početak radova na novoj zgradi krajem maja 2013.g.

on čvrsto vjeruje da će svi radovi biti završeni i prije zadatih rokova. Uvaženom gostu vlasnik firme „ITK-Musić“ Adem Musić je ukratko predstavio svoju firmu, članicu Konzorcija koja će izvesti sve radove iz oblasti niskogradnje. U izjavi datoj za medije ambasador Althakafi je istakao radost zbog svog današnjeg dolaska u Srebrenik i početka gradnje ovog vrlo važnog objekta za cijelu Općinu te iskazao nadu da će za godinu dana na istom mjestu prisustvovati i svečanom otvorenju i useljenju u novoizgrađenu i modernu zgradu općine Srebrenik. Općinski načelnik, Sanel Buljubašić je iskoristio priliku i još jednom se zahvalio ambasadoru Althakafiju na posjeti i dolasku u naš grad, kao i nesebičnoj pomoći Kraljevine Saudijske Arabije Bosni i Hercegovini, kao i ovom našem projektu. Nakon što je učenjem Fatihe na Centralnom spomen obilježju, odao počast šehidima i palim braniteljima u odbrambeno-oslobodilačkom ratu 1992 - 1995 godina, ambasador Althakafi je klanjao podne namaz u centralnoj džamiji u Srebreniku, gdje su mu srdačnu dobrodošlicu, uz brojne džematlije, priredili predsjednik Medžlisa IZ Srebrenik Mevludin ef. Joldić i glavni imam Refik ef. Hodžić. Nakon podne namaza priređen je i



Izgled objekta krajem oktobra 2013.g.



Althakafi je klanjao podne namaz u centralnoj džamiji u Srebreniku

predstavila funkcionisanje i rad OV-a u Srebreniku. Povod za dolazak ambasadora Althakafija je, kako je prethodno navedeno, svečano obilježavanje početka radova na gradilištu moderne zgrade za smještaj organa uprave općine Srebrenik, čije finansiranje je, putem povoljnog zajma u iznosu od 3 miliona američkih dolara, sa grejs periodom od 5 godina,

prigodan program u džamiji, a polaznicima mektske nastave uručena su i posebna priznanja. Zajedno sa domaćinima, uvaženi gost je potom posjetio Stari grad Srebrenik gdje se, kako je sam istakao, oduševio ljepotama ovog, vijekovima starog, kamenog zdanja na obroncima planine Majevica, kao i prelijepim pogledom na srebreničku dolinu. Na kraju posjete načelnik Buljubašić se iskreno zahvalio uvaženom ambasadoru na prvoj posjeti Srebreniku i pozvao ga da nas ponovo posjeti, što je ambasador Althakafi i obećao, čim mu to poslovne obaveze dozvole.

Delegacija slovenačke općine Radlje ob Dravi posjetila općinu Srebrenik

Dana 21.03. 2013. godine općinu Srebrenik je posjetila delegacija slovenačke općine Radlje ob Dravi, na čelu sa Županom, gospodinom Bukovnik Alanom. Nakon niza kontakata sa predstavnicima ove općine u proteklih godinu dana, ovo je bila prva posjeta jedne male ali vrlo napredne slovenačke općine, koja je smještena uz granicu sa Austrijom. Iako po broju stanovnika mala lokalna zajednica, karakteriše je između ostaloga i podatak da je u odnosu na druge i veće slovenačke općine, uspjela povući najviše sredstava iz fondova Evropske Unije u odnosu na broj stanovnika. Vrijedna i mlada ekipa ljudi na čelu sa svojim Županom je preporučila njihov kraj, a treći mandat su dobili od građana je najljepša nagrada i potvrda da su na dobrom putu prosperiteta i napredka. Član njihove delegacije je bio i gospodin Novalija Muminović, koji je naš sugrađanin, rođen i odrastao u naselju Crveno Brdo. Već 36. godina živi i radi u Velenju i Šoštanju, a jedan je od uspješnijih poduzetnika i građevinaru u Sloveniji. Gospodin Muminović je nadaleko poznat i kao veliki dobrotvor i donator koji pomaže siromašne, stipendira djecu - učenike, gradi kuće porodicama slabog imovnog stanja, a on je ujedno i prvi čovjek koji je u Sloveniji izgradio i uvakufio jedan veliki most. Vrijednosti oko 600.000 eura. Za svoj rad i djelovanje na polju humanosti, proglašen je i humanistom godine u Sloveniji. Goste je u svom kabinetu primio načelnik Sanel Buljubašić,



Zajednička fotografija sa gostima iz Slovenije

sa saradnicima i predsjedavajućom OV-a Vesnom Veselčić. Nakon toga je u Plavoj sali Doma kulture održan i sastanak sa članovima Upravnog odbora Udruženja privrednika naše općine, na kome su predstavljene privredni potencijali naše općine i ovoga kraja. Kako je ova slovenačka općina i privredno interesantna, razgovaralo se i o mogućoj saradnji naših privrednika.

Jordanski biznismeni u Srebreniku



Prijem biznismena iz Jordana u kabinetu načelnika Buljubašića

Da je općina Srebrenik na 4.-tom Sarajevo Business Forumu imala uspješnu prezentaciju svojih potencijala i projekata, dokaz je bila i velika zainteresovanost potencijalnih ulagača te posjeta delegacije biznismena iz Arapske Hašemitske Kraljevine Jordan, koji su dana 20.05.2013.godine bili u zvaničnoj posjeti našoj Općini. Načelnik općine Srebrenik Buljubašić Sanel je u svom kabinetu primio uvažene goste - biznismene iz Jordana, a sastanku su, pored njegovih najbližih saradnika, prisustvovali i neki od srebreničkih privrednika iz oblasti za koju su jordanski biznismeni, još u Sarajevu, iskazali svoje interesovanje. Sastanku je prisustvovao i predsjednik Udruženja privrednika Mirza Ordagić. Načelnik Buljubašić se gostima zahvalio na posjeti i interesovanju za potencijalna ulaganja u našoj Općini a, između ostalog, razgovaralo se i o ulaganjima u razvoj poljoprivrede, proizvodnju hrane, podizanje zasada i plantaža voća, kao i druge vrste dugoročnih ulaganja u proizvodne i prerađivačke kapacitete na području naše Općine. Jordanski biznismeni su posjetili kompaniju "Voćni rasadnik" u Špionici, obišli njihove voćnjake, rasadnike i bili vrlo zadovoljni sa onim što su im pokazali direktor Taib Joldić i nadaleko priznati stručnjak i ekspert za voće i voćne sadnice, Dr. Besim Salkić. Gosti su obišli i novoizgrađeni objekat hladnjače i komore za brzo -

zamrzavanje, kao i poslovni objekat i upravnu zgradu u kojoj su i smješteni svi navedeni sadržaji. Domaćini su goste ponudili svojim ukusnim i svježim proizvodima jagode i trešnje, a imali su priliku probati i jabuke iz prošlogodišnje berbe, koje su izuzetno dobro očuvane u njihovim modernim hladnjačama i izgledaju kao da su sad ubrane. Dogovorena je i nova posjeta, koja bi trebala uslijediti u narednih mjesec dana, kada će se razgovarati o konkretnim koracima i uspostavljanju poslovne saradnje. Nakon Voćnog rasadnika, gosti su posjetili i kompaniju "BH - LEGNO" gdje su sa vlasnikom obišli proizvodne pogone i postrojenja ove izuzetno uspješne firme, koja je lider u proizvodnji rezane građe u BiH, a dokaz tome je i izvoz od preko 95 % proizvodnje, uz planiranu godišnju proizvodnju u 2013. g. od oko 20.000 m3 drvene građe. U sjedištu ove renomirane kompanije, čiji je vlasnik Ibrahim Alibegović, prezentaciju na engleskom jeziku je priredio Edin Alibegović, Ibrahimov sin, koji je istakao da je njihova puno modernija i po kapacitetima znatno veća pilana u Bosanskom Petrovcu, gdje



Detalj iz pogona BH-LEGNO

uposlenici rade u tri smjene. Vrlo brzo je ugovoren posao i dogovoreno je da ova firma pripremi nekoliko velikih kontejnera drvene građe i u narednih desetak dana brodom isporuči u Jordan.

Projekat promocije tehnologija i praksi energetske efikasnosti



Detalji sa sastanka u kabinetu načelnika Buljubašića

Dana 19.03.2013. godine, općinu Srebrenik su posjetili predstavnici "USAID Ekonomija Energetske Efikasnosti, 3-E", iz Sarajeva, predvođena zamjenikom direktora, g-dinom Mak Kamenicom. Cilj posjete našoj općini i razgovora sa načelnikom Sanelom Buljubašićem, bio je Projekat promocije tehnologija i praksi energetske efikasnosti, čime se povećavaju kapaciteti općinskih partnera, zatim malih i srednjih preduzeća, a povećava se i svijest građana o dobrobitima energetske efikasnosti, kroz uvođenje sistemskog upravljanja potrošnjom energije i praksama "zelenog ureda". Na ovaj način javni i privatni sektor može ostvariti značajne uštede novca i energije a istovremeno uticati pozitivno na očuvanje naše životne okoline. Općinski načelnik Buljubašić se zahvalio na posjeti, izrazivši spremnost i nadu da i općina Srebrenik bude jedan od partnera u ovom projektu, koji podržava USAID. Nakon sastanka u kabinetu načelnika općine, gosti iz Sarajeva su obišli i novoizgrađeno postrojenje Gradske toplane, koja koristi "drvenu sječku" kao energent za proizvodnju toplotne energije. Moderna postrojenja i kotlovi, sa ekološki prihvatljivim i obnovljivim energentom, značajno su smanjila aero zagađenja urbanog dijela naše općine, a slijede rekonstrukcije kotlana u Domu kulture i SRC-u.

Firma „BUSHNAK“ iz Saudijske Arabije spremna investirati u Srebreniku

Novu potvrdu da je općina Srebrenik jedna od poželjnijih u Bosni i Hercegovini za investicije i ulaganja, dobili smo i od strane Dr. Bushnak Adila, prijatelja Bosne i predsjednika korporacije „BUSHNAK“ iz Džede - Saudijska Arabija. Naime, dana 22.05.2013.godine u BBI Centru u Sarajevu, na lični poziv Dr. Bushnak Adila, načelnik općine Srebrenik Sanel Buljubašić je održao radni sastanak sa Dr. Bushnakom, na kom je predstavio projekat "Akumulacija Bistrička rijeka sa mini hidroelektranom" za koju je korporacija „BUSHNAK“ pokazala izuzetno interesovanje i spremnost za učešće u realizaciji ovog projekta. Ukoliko bi došlo do realizacije ovog projekta, dugoročno bi bio riješen problem snabdijevanja pitkom vodom stanovnika naše Općine, a proizvodnja i prodaja električne energije bi ubrzala povrat sredstava investicije, koja bi, pretpostavlja se, iznosila oko 7 - 8 miliona KM. Dogovoreno je da se čim prije izvrše sve potrebne predradnje i hidrogeološka istraživanja, urade studije izvodljivosti i opravdanosti te izvedbeni projekat, i čim prije krene u samu realizaciju i izgradnju objekata sa instaliranjem potrebne opreme. Saudijska korporacija "BUSHNAK" iz grada Džede je u privatnom vlasništvu ugledne porodice Bushnak (Bošnjak), čiji su se preci prije 100-tinjak godina iselili iz okoline Bugojna, a ova kompanija je svjetski lider u procesu desalinizacije morske vode kao i svim vrstama i tretmanima voda.-„Tokom ranije posjete BiH obišao sam pojedine fabrike i razgovarao sa vlasnicima. Odlučili smo da im pomognemo da izvoze svoje proizvode u Saudijsku Arabiju i druge zemlje svijeta. Podržavam rad Sarajevo Business Forum (SBF), jer se iz godine u godinu na istom prezentuje sve više kvalitetnih projekata, za koje će se, nadam se, naći odgovarajući investitori. Ovaj projekat, o kojem me je na sastanku načelnik općine Srebrenik Buljubašić Sanel detaljnije upoznao, je od obostranog interesa i nadam se uspješnoj realizaciji istog"- istakao je Dr. Bushnak na kraju sastanka.

Održana radionica i predavanje na temu: „Solarna energija - životna energija“

Dana 08.03.2013. godine u 17 sati, održan je radionica i predavanje u objektu Centra za dnevni boravak djece sa posebnim potrebama u Srebreniku na temu "Solarna energija – životna energija". Radionici su prisustvovali predavači iz Njemačke: Mr. Sabur Ahtari - Afghan Bedmosch Solar Center e. V. Freiburg i Amira Bieber, projekt koordinator organizacije "Merhamet Deutschland" te gosti: Štauber Branka iz Udruženja "Snaga žene", predsjednik MDD "Merhamet" TK-a, Adil ef. Pezerović i predsjednik MDD "Merhamet" Srebrenik, Osman ef. Mujić. Općinski načelnik Sanel Buljubašić se zahvalio našim prijateljima iz Njemačke, Mr. S. Ahtari - ju i Amiri Bieber na dolasku i ideji da se jedan ovakav projekat realizuje na području naše Općine uz aktivno uključanje djece i osoba sa posebnim potrebama. Uspješnom realizacijom ovog projekta i nastavkom sličnih projekata Srebrenik bi u skoroj budućnosti mogao postati značajan centar za razvoj i proizvodnju solarnih sistema za masovnu upotrebu, prepoznatljiv u Bosni i Hercegovini i šire. U novoizgrađenom objektu i prostorijama Centra za djecu sa posebnim potrebama, održana je radionica i predavanje na temu "Solarni projekti socijalne inkluzije i u Bosni i Hercegovini, a na primjeru Afganistana". Pozitivni primjeri korištenja solarne energije i proizvodnje solarnih kolektora u Afganistanu, prezentovani su prisutnima uz napomenu da bi se njihova pozitivna iskustva mogla iskoristiti i u Bosni i Hercegovini, posebno za povratničku populaciju u Podrinju, gdje još uvijek veliki broj naselja ili domaćinstava nema pristup električnoj energiji. Osim toga, korištenje solarnih kolektora i



Svim gostima načelnik Buljubašić je uručio prigodne poklone

proizvodnja solarne energije kao najčišćeg i najjeftinijeg - nepresušnog prirodnog resursa, dugoročno treba imati primjenu kod što većeg broja domaćinstava u Bosni i Hercegovini i u cijelom svijetu. Gospodin S. Ahtari je ekspert za solarnu energiju u Njemačkoj u gradu Freiburgu i već dugo radi na sličnim projektima u Njemačkoj i u svojoj domovini Afganistanu. Načelnik Buljubašić je na kraju radionice svim gostima kao i predsjedniku Udruženja Civilnih invalida I i II kategorije, Enesu Džaniću, uručio prigodne poklone: Srebreničku povelju i sliku Starog grada - Gradine.

U rekonstrukciju gradskog poligona uloženo 71.000 KM



Gradski poligon je zvanično otvorio načelnik Sanel Buljubašić

Dana 17.04.2013.godine u 9 sati, Sportski savez općine Srebrenik je upriličio prigodnu svečanost, na kojoj je općinski načelnik Sanel Buljubašić zvanično otvorio rekonstruisani gradski poligon u centru Srebrenika, u čiju je rekonstrukciju uloženo oko 71.000 KM. –„Meni je pripala čast da danas zvanično otvorim ovaj rekonstruisani gradski poligon. Obzirom da će se na ovom, sada prelijepom, poligonu, danas održati tradicionalni fudbalski turnir u malom nogometu, na kome će se takmičiti učenici svih osnovnih škola sa područja naše općine, mislim da se nije mogao odabrati ljepši i prikladniji trenutak za otvorenje. Nadam se da ćemo se u budućnosti svi prema poligonu odnositi daleko odgovornije, te da će oni, kojima se isti bude dao na upravljanje, znati kvalitetno upravljati i održavati ovaj objekat, koji nikada više nesmiye biti ruglo u centru Srebrenika“-istakao je načelnik Buljubašić. –„Dana 25.07.2012.godine u općini Srebrenik su predstavnici Fonda



Rekonstruisani gradski sportski poligon

otvoreno društvo BiH, općine Srebrenik i izvođača radova (JP "9. septembar" Srebrenik i "Hidromont" d.o.o. Srebrenik) potpisali ugovore o realizaciji dva radno-intenzivna projekta, čija je osnovna svrha bila da u relativno kratkom vremenu omoguće privremeno radno angažovanje i stvaranje dohotka za oko 50 osoba sa evidencije Biroa za zapošljavanje Srebrenik. Ovim projektima su bili obuhvaćeni radovi na dva projekta:1) čišćenje vodotoka grada Srebrenika i gradskog poligona (igralište iza MSŠ Srebrenik), i čijem svečanom otvorenju danas prisustvujemo, ukupne vrijednosti 71.153,00 KM, a koji je uspješno realizovala firma "Hidromont" d.o.o. Čehaje-Srebrenik. Za uređenje gradskog poligona općina Srebrenik je obezbijedila oko 21.000 KM, dok je preostali iznos od 50.000 KM obezbijedio Fond otvoreno društvo BiH, koji je osnovao Džordž Soroš.“-istakao je koordinator navedenih radova ispred općine Srebrenik Ibrahim Smajlović.

Za rekonstrukciju ulice Maršala Tita u Srebreniku 150.000 KM

Dana 15.08.2013.godine završena je rekonstrukcija 215 m duge ulice Maršala Tita (od raskrsnice u centru grada do autobuske stanice) u Srebreniku. Navedenu rekonstrukciju, koja se realizovala u sklopu projekta izgradnje nove općinske zgrade i rekonstrukcije gradskih ulica, je obavio



Detalj sa završnog asfaltiranja rekonstruisane ulice

konzorcij srebreničkih firmi predvođenih nosiocem konzorcija firmom „Herceg“ d.o.o. Srebrenik, nadzor je vršila firma „Tehnobiro“ d.o.o. Tuzla, a radovi su trajali od 10. jula do 15. avgusta 2013. godine. Na rekonstruisanoj ulici urađena je odvodnja oborinskih voda, dio potpuno nove fekalne kanalizacije u dužini od oko 40 m, rekonstruisana vodovodna mreža tj. zamijenjene su stare azbest-cementne sa PHD cijevima, uz izradu novih priključaka na vodovodnu instalaciju, nova savremena podzemna javna rasvjeta, a postavljene su podzemne instalacije i za telefoniju te kablovsku televiziju. Nakon toga



Detalj rekonstruisane ulice Maršala Tita

po ulici je postavljena asfaltna podloga u 2 sloja i to nosivi sloj BNS-32 debljine 7cm i habajući sloj AB-11 debljine 4cm, asfaltirani su trotoari sa AB-11 debljine 4cm nakon čega je popločan trotoar od SPO „Nita“ do kafea „Duga“. U rekonstrukciju ulice općina Srebrenik je uložila 150.000 KM.

U izgradnju izložbeno-prodajnog salona i obradno reznog centra „Herceg“ Srebrenik uložio 1,5 milion KM

U sklopu obilježavanja 21. juna, Dana općine Srebrenik, dana 21.06.2013.godine, u prisustvu brojnih zvanica, simboličnim presijecanjem vrpce od strane premijera Vlade TK-a Seada Čauševića, općinskog načelnika Sanela Buljubašića i suvlasnika firme Herceg Sulejmana Hercegovca, svečano je otvoren izložbeno-prodajni salon i obradno rezni centar u kompaniji za proizvodnju PVC i Al stolarije „Herceg“ u Srebreniku, u čiju je izgradnju uloženo oko 1,5 miliona KM. Kako je na ceremoniji



Svečano otvorenje izložbeno-prodajnog salona firme Herceg

otvorenja istakao Ramiz Karić, direktor „Herceg“ d.o.o. Srebrenik, danas se u proizvodnim pogonima društva Herceg proizvode od najjednostavnijih do nasloženijih proizvoda iz programa PVC i Al prozora i vrata, luftirajućih fasada (tipa staklo, alukobond, trespa i sl.), balkonske, stubišne i dvorišne ograde, sekciona vrata, građevinska limarija... Ono što naši budući kupci trebaju da znaju jeste činjenica da naši proizvodi sa aspekta zdravlja i sigurnosti zadovoljavaju najviše svjetske standarde. Naši prozori i vrata su energetske efikasni proizvodi, izvanredne zvučne i toplotne izolacije, čuvaju okolinu i spadaju u kategoriju „zelenih“. Pored proizvodnje, za sve naše proizvode obavljamo veoma kvalitetnu montažu, servis i održavanje u garantnom i vangarantnom roku. – Od male porodične firme postepeno, ne napadno, nekako u skladu sa normalnim rastom i razvojem, u proteklih 30 godina izrasli smo u respektabilnu kompaniju sa oko 260 zaposlenih, jednu od najvećih firmi ove vrste u BiH. Iako svjesni svih problema na tržištu, uspijevamo opstati i dalje se razvijati, a otvorenje nove linije automatskog obradno-reznog centra (jedan od rijetkih



Izložbeno-prodajni salon firme Herceg

na Balkanu) kao i modernog izložbeno-prodajnog salona površine 500 m² to i dokazuje. U novoootvorenom izložbeno-prodajnom salonu potencijalnim kupcima omogućeno je da u autentičnom ambijentu pogledaju kompletan proizvodni program naše kompanije – istakao je Hercegovac Sulejman. – Kompanija „Herceg“ d.o.o. Srebrenik, kao jedan od nosilaca industrijskog razvoja na području TK-a, stvara preduvjete za očuvanje postojećih i otvaranje novih radnih mjesta. Savremeno tržište, posebno ono u razvijenim zemljama zapada, zahtijeva visoke standarde koji su u firmi „Herceg“ zadovoljeni temeljem brojnih neophodnih certifikata, bez kojih bi vrata ino-tržišta bila zatvorena. Vlada TK-a je pomagala i do sada a pomagaće privrednike i ubuduće, naravno u skladu sa mogućnostima budžeta, ali često puta ni privrednici nisu iskazivali dovoljno inventivnosti niti spremnosti na minimum rizika, kako bi poboljšali svoje poslovanje. Upravo posjedovanje prestižnih certifikata, konstantno sticanje novih znanja, uvođenje novih tehnologija, od velikog su značaja za strukturu plasmana proizvoda Hercega u kojoj je strano tržište Belgije, Holandije, Austrije, Švicarske, Norveške, Luksemburga, Slovenije i daleke Australije zastupljeno više od 70%, a ovo je primjer i za druge privrednike kako da rade ukoliko žele da uspiju – istakao je premijer Vlade TK-a Sead Čaušević.

Posjete preduzećima „Zaharex“ i „Tempoplast“

U sklopu Aftercare programa za 2013. g., predstavnik FIPA-e Nina Pobrić, načelnik Općine Srebrenik Sanel Buljubašić sa savjetnikom za investicije i monitoring Halidom Kovačem, te predstavnicima Ministarstva razvoja i poduzetništva TK-a Mirela Omerović i Erna Sulejmanović, su 12.04.2013. g. posjetili firmu „Zaharex“ d.o.o. Srebrenik. Sastanak je održan sa vlasnikom firme Harunom Hasanovićem. Zaharex je vodeći proizvođač madraca, bonel žičanih jezgri, spužve i posteljine, prekrivača, štep deka, jastuka, jorgana, nadmadraca u Bosni i Hercegovini, a sa njihovim predstavnicima je razgovarano o iskustvima poslovanja u BiH, preprekama i problemima na koje su nailazili u poslovanju te njihovim prijedlozima za unapređenje poslovnog ambijenta i planovima za budućnost. U sklopu istog programa, predstavnik FIPA-e Nina Pobrić, Halid Kovač, te predstavnik Federalnog Ministarstva energetike, industrije i rudarstva Eldara Šoše, su 30.05.2013. g. posjetili kompaniju „Tempoplast“ doo Srebrenik. Sastanak je održan sa generalnim direktorom kompanije Mustafom Yavuzom i Fatihom Yavuzom. Kompanija „Tempoplast“ je članica internacionalne grupacije koju čine kompanije Yavuz International Company iz Turske, zatim „Yavuz“ doo BiH i „Tempoplast“ Srbija. Ova firma se bavi proizvodnjom kvalitetne i inovativne PVC stolarije. – „Firma „Tempoplast“ doo Srebrenik je osnovana 2009. g.

i do sada smo u nju investirali oko 1,8 miliona KM. Firma trenutno zapošljava 55 uposlenika od čega je, osim nas dvojice, sve domaća radna snaga. U 2012. g. smo od prodaje gotovih proizvoda ostvarili prihod od oko 4,8 miliona KM, a posebno smo zadovoljni što već dvije godine zaredom bilježimo porast prodaje u iznosu od po 35%, kao i značajno povećanje izvoza u Srbiju, Hrvatsku i Slovačku. Kvalifikovana i jeftina radna snaga, sigurno okruženje, blizina tržišta (BiH, zemlje okruženja kao i zemlje EU) te bilateralni sporazumi su prednosti Srebrenika prilikom privlačenja potencijalnih investitora, dok su preglomazna i spora administracija te nepostojanje poticaja za otvaranje proizvodnih radnih mjesta na državnom ili drugom nivou vlasti, glavne slabosti BiH u ovom segmentu i to treba popraviti, ukoliko želite privući nove investitore – istakao je Mustafa Yavuz. Ove posjete su realizovane kroz saradničku mrežu za postinvesticionu podršku stranim investitorima u BiH, koju čine Agencija za unapređenje stranih investicija u BiH (FIPA) kao koordinator aktivnosti, nadležne institucije FBiH, kantona i općina, a koja je predviđena ugovorom o saradnji između Vijeća ministara BiH i Međunarodne finansijske korporacije (IFC) na projektu poboljšanja poslovnog okruženja u BiH.

Svečanom sjednicom završeni „Dani otpora 2013“



Polaganje cvijeća na Centralno spomen obilježje

Dana 20.06.2013.godine u JU "Centar za kulturu i informisanje" Srebrenik održana je Svečana sjednica Koordinacije boračkih udruženja općine Srebrenik, kojom su završene aktivnosti na obilježavanju "Dana otpora - 2013". Tom prilikom položeno je cvijeće na Centralno spomen obilježje na Trgu Alije Izetbegovića a potom i na Spomen kosturnicu. Na Svečanoj sjednici je prigodan referat podnio ratni komandant 1. Bataljona 211. Oslobođilačke brigade Srebrenik i predsjednik Skupštine SDB TK-a, Bajro Imširović. Prisutnima se obratio i općinski načelnik Sanel Buljubašić, koji je istakao značaj i ogroman doprinos naših boraca i jedinica u odbrambeno - oslobodilačkom ratu 1992 - 1995. godine, i našu obavezu da istrajemo na očuvanju sjećanja na slavu borbu za slobodu i odbranu domovine. Ministar za boračka pitanja u Vladi TK-a Ibrahim Salihović u obraćanju prisutnima istakao je značaj i ulogu boraca i patriota općine Srebrenik u proteklom ratu, kao i našu obavezu da sačuvamo sjećanja na naše šehide i poginule borce - branitelje. U povodu manifestacije "Dani otpora - 2013" i 21. juna, Dana općine Srebrenik, Koordinacija boračkih udruženja je dodijelila a načelnik općine Srebrenik Sanel Buljubašić je uručio Zlatne plakete sljedećim pojedincima:

- 1. Muaz Ibrišimović - RVI**
- 2. Mersudin Bećirović- Eko - RVI**
- 3. Salko Kadrić - RVI**
- 4. Hašim Jusufagić - k-dir 2. čete 3/212. Brdske brigade**
- 5. Ahmet Bašić - k-dir 3. čete 3/212 Brdske brigade**
- 6. Esad Mulahasanović - k-dir 1.čete 3/212 Brdske brigade**

Za izuzetan doprinos u njegovanju historijskih vrijednosti odbrambeno - oslobodilačkog rata 1992 - 1995 nagrađen je Medžlis IZ Srebrenik, a za izvanredan doprinos u rješavanju



Detalj sa svečane sjednice povodom Dana otpora 2013

socijalno - egzistencijalnih problema boračke populacije općine Srebrenik nagrađena je Služba za BIZ općine Srebrenik. Za izuzetan doprinos u organizovanju odbrane općine Srebrenik nagradu je dobio Mustafa Smajlović - OSNO Srebrenik. U okviru manifestacije "Dani otpora - 2013" održana su i razna takmičenja a u streljaštvu i malom nogometu proglašeni su najbolji pojedinci i ekipe kojima su takođe uručena priznanja, medalje i pehari. U gađanju vazdušnom puškom - ekipno postignut je sljedeći rezultat:

- 1. mjesto je pripalo ekipi ORVI-a Srebrenik (Samir Piragić i Mirsad Tokalić)**
- 2. mjesto je pripalo ekipi OK RVI-a (Agan Mašić i Nermin Joldić)**
- 3. mjesto je pripalo ekipi OKP Policijska stanica Srebrenik (Miralem Šabić i Hajrudin Ikanović)**



Plakete najboljima je uručio Abdurahman Fazlić

Pojedinačno je za najboljeg strijelca takmičenja proglašen je **Agan Mašić**.

-I pripadnice ljepšeg pola su uzele učešće u takmičenju u streljaštvu a postignuti su sljedeći rezultati:

- 1. mjesto - Maida Smajlović**
- 2. mjesto - Meliha Podgorčević**
- 3. mjesto - Almira Mujačević**

Nagrade im je uručio pukovnik Abdurahman Fazlić, ratni komandant 212. Brdske brigade Srebrenik. Na fudbalskom malonogometnom turniru - takmičenju učestvovalo je četrnaest (14) ekipa, a najbolji su bili:

- 1. mjesto - fudbalska ekipa "Babunovići"**
- 2. mjesto - fudbalska ekipa "Gradina"**
- 3. mjesto - fudbalska ekipa "Kiseljak"**



Diplome i pehare je uručio Fadil Vikalo

Diplome i pehare im je uručio Fadil Vikalo, ratni komandant OpŠTO Srebrenik.

Svečanom sjednicom obilježen

Svečanom sjednicom Općinskog vijeća Srebrenik, danas je na prigodan način obilježen 21. juni, Dan općine Srebrenik. Na sjednici je bilo prisutno na desetine gostiju, kako iz Srebrenika i sa drugih općinskih područja tako i iz Republike Hrvatske. Uz predstavnike izvršne i zakonodavne vlasti Općine Srebrenik, direktore JU-a i JP-a, vjerskih ustanova, boračkih udruženja te brojnih medija, svečanosti su prisustvovali i potpredsjednik FBiH Svetozar Pudarić, premijer u Vladi TK Sead Čaušević, poslanici u Parlamentu FBiH Osman Suljagić i Enver Mehmedović, zamjenik predsjedavajućeg Skupštine TK-a Zlatko Šimić,



Počast su odali i potpredsjednik FBiH, premijer u Vladi TK kao i predstavnik Skupštine TK-a

župan Vukovarsko-Srijemske županije Božo Galić, dogradonačelnik Vinkovaca Tomislav Šarić, bivši hrvatski ambasador u BiH Josip Vrbošić, kao i mnogi drugi ugledni gosti. Nakon što je položeno cvijeće na spomen obilježje šehidima i poginulim borcima na Trgu Alije Izetbegovića iz rata 1992-1995. godina odnosno borcima NOR-a 1941-1945. godina, održana je svečana sjednica OV-a Srebrenik, na kojoj je načelnik Općine Srebrenik Sanel Buljubašić između ostalog kazao: „Srebrenik je oduvijek poznat kao grad mira, tolerancije i suživota, koji gaji interkulturalni identitet. S ponosom ističemo da potičemo iz mjesta u kojem su se održavali državnički susreti najvišeg nivoa od davnina, grada koji je kroz historiju BiH bio njena važna karika u historijskom, geopolitičkom, strateškom i privrednom smislu. Danas je to grad koji je prije svega



Predstavnici izvršne i zakonodavne vlasti općine Srebrenik polažu cvijeće na Spomen - kosturnicu

okrenut privrednicima i koji kroz realizaciju niza aktivnosti nastoji poboljšati poslovnu klimu i privući potencijalne investitore na ovo općinsko područje. Čestitam svim građanima Dan općine Srebrenik, te obećajem daljnji razvoj Općine, kroz implementaciju brojnih projekata, posebno na polju ekologije i energetske efikasnosti". U nastavku sjednice uručena su općinska priznanja. Predsjedavajuća OV-a Srebrenik Vesna Veselić je najveće općinsko prizna-



Načelnik Buljubašić: Srebrenik je grad posvećen privrednicima
priznanje Plaketu dodijelila:

- Alatić Kemalu** iz Caga - za izuzetan doprinos u razvoju privrede na području općine Srebrenik,
- Delić Murselu** iz Urože - za izuzetan doprinos u razvoju sporta na području općine Srebrenik i šire,
- DOO „Gromeks“ Srebrenik** - za izuzetan doprinos u razvoju privrede na području općine Srebrenik i
- Husarić Aganu** iz Behrama - za izuzetan doprinos i postignute rezultate u oblasti odbrane u periodu odbrambeno oslobodilačkog rata 1992.-1995. godine.



Dobitnici najvećeg općinskog priznanja Plakete

Povelje su uručene:

- Avdić Bešlagi** iz C. Brda - za doprinos u razvoju infrastrukture na području MZ Podorašje i šire,
- Klubu mladih Crvenog križa općine Srebrenik** - za izuzetan doprinos i nesebičan rad, kao i podršku u svim humanitarnim oblastima,
- DOO „Zaharex“ iz Srebrenika** - za doprinos u razvoju privrede na području općine Srebrenik,
- Omić Mehmedaliji** iz Ježinca - za doprinos u razvoju infrastrukture na području MZ Ježinac i šire,
- Suljagić Osmanu** iz Srebrenika - za izuzetan doprinos i postignute rezultate u razvoju općine Srebrenik i
- Šabić Muhamedu** iz N.N. Luka - za izuzetan doprinos i postignute rezultate u oblasti odbrane u periodu odbrambenog oslobodilačkog rata 1992-1995. godina i razvoju MZ N.N.Luka.

21. juni, Dan Općine Srebrenik



Dobitnici Povelje

Nagradu Humanisti godine su dobili:

- Hasanović Teufik** iz Srebrenika – kao dugogodišnji davalac krvi i za izuzetan doprinos u akcijama dobrovoljnog darivanja krvi,
- Imširović Harun** iz Seone – za izuzetan doprinos i nesebičan rad kao i podršku u svim humanitarnim oblastima,
- UG „Pustinjska ruža“** iz Srebrenika - za izuzetan doprinos i nesebičan rad kao i podršku u svim humanitarnim oblastima i
- Zukić Fahir** iz Lisovića – za izuzetan doprinos i nesebičan rad, kao i podršku u svim humanitarnim oblastima.



Humanisti godine

U nastavku sjednice općinski načelnik Sanel Buljubašić je dodijelio zahvalnice:

- Džanić Mirsadu** iz Ljenobuda - za učešće i doprinos u odbrani u periodu odbrambenog oslobodilačkog rata 1992-1995. godina,
- Marković Tunji** iz Drapnića – za doprinos u razvoju MZ Podorašje,
- Muharemović Danici** iz Sladne - za doprinos u obrazovanju i odgoju mladih na području općine Srebrenik,
- Osmić Enadu** iz Caga - za doprinos u razvoju MZ Cage,
- Omladinskom pokretu „Rebus“** iz Srebrenika – za doprinos u poboljšanju položaja mladih i omladinskog aktivizma na području općine Srebrenik,
- Salihović Šahi** iz Srebrenika - za doprinos u obrazovanju, odgoju mladih i razvoju kulture na području općine Srebrenik,
- Tursunović Almiru** iz Tinje – za savjestan i korektan rad sa strankama i razvoju MZ Tinja Gornja i
- Velić Mevludinu** iz Potpeća – za doprinos u razvoju MZ

Zamjenik predsjedavajuće OV-a Srebrenik Zihir Suljić je dodijelio novčane nagrade koje su dobili:



Dobitnici Zahvalnice

- Glотиć Naida** iz Dedića - za postignute rezultate iz oblasti obrazovanja i sporta,
- Hirkić Samra** iz Tinje– učenica generacije JU MSŠ Srebrenik,
- Joldić Albin** iz Babunovića - za postignute rezultate iz oblasti obrazovanja i zaštite okoliša,
- Mujačević Almira** iz Tinje - za postignute rezultate iz oblasti matematike učenika srednjih škola na kantonalnom nivou,
- Mujić Vanesa** iz Brnjičana - za postignute rezultate iz oblasti obrazovanja,
- Muratović Mirsada** iz Hurema - za postignute rezultate iz oblasti obrazovanja i
- Salihović Almisa** iz Špionice - za postignute rezultate iz oblasti obrazovanja i pomoći i brizi starim i iznemoglim osobama.



Dobitnici novčanih nagrada

Zahvalnice općine Srebrenik je uručio načelnik Buljubašić:

- Karić Fehratu** iz Rapatnice – za izuzetan doprinos u razvoju infrastrukture na području MZ Rapatnica, **Ibrić Fakić** iz Špionice - za postignute rezultate u organizovanju akcija dobrovoljnog darivanja krvi i realizaciji Programa socijalne zaštite ugroženih kategorija stanovništva, **Nišić Sumedinu** iz D. Srebrenika – za doprinos u razvoju nauke i obrazovanja na području općine Srebrenik, **Jukan Ekremu** iz Srebrenika - za izuzetan doprinos u radu UABNOR-a općine Srebrenik, **Karate klubu "1. Mart"** Srebrenik, – za izuzetne zasluge u razvoju sporta na području općine Srebrenik, **Bekrić Enveru** iz Srebrenika - za izuzetan doprinos u očuvanju i unapređenju stanja bezbjednosti na području općine Srebrenik, **Delić Refiku** iz Brezika – za izuzetan doprinos u razvoju infrastrukture na području MZ Brezik i **Mašić Aganu** iz Brda - za izuzetan doprinos i postignute rezultate u oblasti odbrane u periodu odbrambenog oslobodilačkog rata 1992-1995. g. i podršku u svim humanitarnim akcijama. Nakon zvaničnog dijela za goste je priređen prigodan kulturno-umjetnički program.

U Srebreniku poplave prouzročile velike štete

Zbog poplava koje su dana 11.05.2013.godine izbile na širem području općine Srebrenik, nakon obilnih kišnih padavina praćenih olujnim nevremenom, na vanrednoj sjednici Općinskog Štaba Civilne zaštite (OpŠCZ) Srebrenik usvojen je prijedlog nakon čega je načelnik općine Srebrenik Sanel Buljubašić donio Odluku o proglašenju stanja prirodne nepogode od poplave na području općine Srebrenik. Prema informacijama dobijenim sa terena nakon višesatnih obilnih kišnih padavina, praćenih olujnim nevremenom, mjesno područje Podorašja, Tinje, Dubokog Potoka, Srebrenika i Špionice je zahvaćeno poplavama, kojom prilikom je značajan broj stambenih i pomoćnih objekata poplavljen a pričinjene su i velike štete na mostovima i putnoj infrastrukturi. Najveće štete je pretrpio rejon oko sportskog poligona u Podorašju, poplavljen je pijaca u Tinji, oštećen je most između Dedića i Seone, poplavljen je desetak kuća u Dubokom Potoku, Špionici i Potpeću, na području Gornje Tinje i Dedića te Lipja na putnu komunikaciju kiša je nanijela



Od lokalnih vodotoka poplavljeno je i područje Potpeća



Detalj sa poplavljenih područja

oko stotinjak kubnih metara raznog materijala, čime je u značajnoj mjeri bilo onemogućeno normalno odvijanje saobraćaja, izlio se Tutnjevački potok koji je zatvorio saobraćaj od centra Špionice prema Tutnjevcu a postojala je opasnost plavljenja kuća u Špionici, neposredno uz korito rijeke Tinje i Tutnjevačkog potoka... Hitno su angažovani vatrogasci te druge službe zaštite i spašavanja na pomoći stanovništvu, ali su i sami građani preduzeli hitne mjere na čišćenju začepljenih propusta, koji su u znatnoj mjeri i doprinijeli do plavljenja pojedinih objekata, dok su svi oni koji su bili direktno ugroženi od poplave podigli namještaj i električne uređaje na više kote, kako bi eventualno nastale štete bile manje. Dana 14.05.2013 godine, na sjednici OpŠCZ Srebrenik, nakon razmatranja informacije o stanju na terenu nakon preduzetih hitnih mjera zaštite i spašavanja i normalizacije stanja na terenu, dat je prijedlog Općinskom načelniku da donese Odluku o prestanku stanja prirodne nepogode od poplave što je on i uradio.

Ekspedicija iz Srebrenika osvojila Maglić

Članovi i prijatelji Gorske službe spašavanja Srebrenik su 1. i 2. juna 2013. g. organizirali ekspediciju u prašumu Perućica, s ciljem obilaska istog i uspona na vrh Maglić. Ekstremna raznolikost pejzaža, veliko bogatstvo i raznovrsnost biljnog i životinjskog svijeta i brojni spomenici starije i novije historije odlikuje ovaj izuzetni kutak Evrope. Na relativno malom prostoru nalaze se duboki kanjoni, gusti šumski kompleksi, prelijepi planinski pašnjaci, glečerska jezera i visoki stjenoviti planinarski vrhovi. U ekspediciji su učestvovali: Ćudić Elvir, Ćudić Elvedin, Ćudić Selma, Lišić Ajdin, Admir Karić, Nermin Jašarević, Amir Jašarević, Dijana Imširović, Mahir Suljić, Elvis Bajrić, Mehmedalija Sarajlić, Alma Hodžić, Amela Jašić, Željko Babić, Toni Babić, Sanel Ibrić, Dijana Jašarević, Nedim Ibrić i Bajro Imširović. Naša ekipa je na put krenula 1. juna rano ujutro. Vođe ekspedicije su bili članovi kluba Visokogoraca Sarajevo, te Nešo i Peđa iz kluba Wolf iz Foče. Duboko motivirani da osvoje najviši vrh BiH, krenuli su sa Dernečišta, gdje su ostavili vozila. Izuzetno loše i promjenljivo vrijeme je bilo dodatni otežavajući faktor jer su predhodnih dana pale velike količine snijega, a čitavo vrijeme su se smjenjivali jaki udari vjetrova, kiše, susnežice i snijega, uz konstantno veoma hladno vrijeme, te im potvrđivali o kakvoj se planini radi. Krećući se tzv. „Poštarevim putem“, nakon prelaska granice i ulaska u Crnu Goru, na 2.062 m



Naša četiri člana sa vođama ekspedicije na najvišem vrhu BiH

nadmorske visine, održan je sastanak i izvršena procjena situacije. – „Uzimajući u obzir vrijeme s jedne strane i našu neopremljenost za zimski uspon: nemamo cepine, dereze, tozluke, kvalitetnu odjeću i obuću itd., odlučili smo da sa Adnanovom ekipom kretanje nastave četiri naša člana: Ćudić Elvir, Sarajlić Mehmedalija, Jašarević Nermin i Lišić Ajdin, a da se ostali vrate i pripreme logor na Prijedoru. Oko 16 sati ova ekipa se popela na vrh Maglića i time je ušla u historiju, jer je postala dio jedne manje grupe Srebreničana koji su ispenjali ovaj vrh.“-istakao je Bajro Imširović. – „Uslovi koji su danas vladali na Magliću tokom uspona učinili su da uspon bude teži nego uspon na Mont Blan. Ovo je klasičan zimski uspon koji je gotovo nemoguće uraditi bez alpinističke opreme za zimske uslove. Momci su prva liga i ja im čestitam na upornosti, disciplini i znanju“-istakao je Adnan, predsjednika kluba Visokogoraca Sarajevo. Čestitamo našim hrabrim članovima iz Kluba spasilaca „Gradina“ i Gorske službe spašavanja na uspjehu i zahvaljujemo se na još jednoj uspješnoj promociji Srebrenika.

Svečano obilježen 1. mart, Dan civilne zaštite BiH

Dana 28.02.2013.g., u Plavoj sali Doma kulture u Srebreniku, održana je svečana sjednica Općinskog štaba civilne zaštite Srebrenik (OpŠCZ), kojom je na prigodan način obilježen 1. mart, Dan civilne zaštite BiH i Svjetski



Načelnik OpŠCZ Srebrenik Bajro Imširović je pročitao proglas Generalnog sekretara

Međunarodne organizacije civilne zaštite Dan civilne zaštite. Pored članova OpŠCZ, i svih jedinica za spašavanje u sklopu Civilne zaštite, svečanoj sjednici prisustvovali su i predstavnici zakonodavne i izvršne vlasti Općine Srebrenik, direktor Kantonalne uprave Civilne zaštite TK-a Zdenko Tadić, predstavnik Ministarstva sigurnosti BiH Samir Huseinbašić, direktori javnih preduzeća i javnih ustanova, predstavnici civilnog društva te predstavnici sredstava informisanja. Na početku sjednice, moderator i član OpŠCZ Srebrenik Nedim Muččinović je svim prisutnim čestitao 1. mart, Dan nezavisnosti BiH i Dan civilne zaštite BiH, nakon čega je načelnik OpŠCZ Srebrenik Bajro Imširović pročitao



Samir Huseinbašić: Profesionalci i volonteri CZ-e su snage prvog odgovora u slučaju prirodne nesreće

proglas Generalnog sekretara Međunarodne organizacije civilne zaštite. – „Međunarodna organizacija civilne zaštite je Rezolucijom na svojoj 9. sjednici generalne skupštine u Ženevi 1990. g., odredila 1. mart za proslavu Svjetskog dana civilne zaštite, jer je 1. marta 1972. g. formirana Međunarodna organizacija civilne zaštite kao međudržavna vladina organizacija. Bosna i Hercegovina je od 6. juna 1994



Detalj sa obilježavanja 1. marta, Dana civilne zaštite BiH



Načelnik Buljubašić Sanel dodjeljuje pohvalu Klubu spasilaca Gradina

g. članica ove međudržavne organizacije" istakao je između ostalog Imširović. U nastavku sjednice prisutnima se obratio komandant OpŠCZ Srebrenik Sanel Buljubašić. – „S obzirom na historiju, uspjehe i rezultate naše službe Civilne zaštite, općina Srebrenik se ponosi svojom Civilnom zaštitom, kojom je obuhvaćeno cijelo općinsko područje. Civilna zaštita je dobro organizirana i tehnički opremljena te 24 sata u službi svih naših građana, što je najočitije u vanrednim situacijama, kad se treba nositi s prirodnim nepogodama, poput požara, poplava ili ratnih



Načelnik Buljubašić Sanel dodjeljuje pohvalu Crvenom križu

stradanja" istakao je između ostalog Buljubašić. Nakon kratkog filma o globalnoj borbi protiv mina, prisutnima se obratio direktor Kantonalne uprave Civilne zaštite TK-a Zdenko Tadić, koji je upozorio na povećanu mogućnost prirodnih nesreća u BiH i pohvalio srebreničku Civilnu zaštitu na dosadašnjim rezultatima i uspjesima, te predstavnik Ministarstva sigurnosti BiH Samir Huseinbašić koji je prisutne upoznao sa značajem Civilne zaštite u današnje doba te istakao da su profesionalci i volonteri Civilne zaštite snage prvog odgovora u slučaju prirodne nesreće, te da već duže vrijeme prati uspješan rad CZ-e TK-a i općine Srebrenik. Istaknutim pojedincima nagrade i priznanja dodijelio je komandant OpŠCZ Srebrenik Sanel Buljubašić. Pismene



Načelnik Buljubašić Sanel dodjeljuje novčanu nagradu Suljić Nuragi

pohvale OpŠCZ Srebrenik dodijeljene su Klubu spasilaca Gradina Srebrenik i Crvenom križu Općine Srebrenik a novčanu nagradu u iznosu od 100 KM dobio je sekretar OpŠCZ Srebrenik Nuraga Suljić. Nakon završetka zvaničnog dijela Svečane sjednice upriličeno je kratko druženje u holu Doma kulture.

Združena taktičko-pokazna vježba "Snaga odgovora 2013"

Dana 23.06.2013.g., na lokalitetu Stari grad "Gradina" u Srebreniku, održana je združena taktičko-pokazna vježba snaga zaštite i spašavanja općine Srebrenik pod nazivom "Snaga odgovora - 2013". Ovu vježbu su izvodile sljedeće snage: Profesionalna vatrogasna jedinica Srebrenik; Dobrovoljna vatrogasna jedinica Vatrogasnog društva Srebrenik; Vatrogasni podmladak Vatrogasnog društva Srebrenik; Pripadnici Policijske stanice Srebrenik; Hitna medicinska služba J.Z.U. "Dom zdravlja" Srebrenik; Gorska služba spašavanja Srebrenik; Klub spasilaca "Gradina" Srebrenik; Klub terenaca "4x4" Srebrenik; i Crveni križ općine Srebrenik. U vježbi je sudjelovalo 67 pripadnika ovih snaga. Nažalost, zbog tehničkih i administrativnih problema vježbi nisu prisustvovali pripadnici snaga EUFOR-a, koji su trebali sudjelovati u spašavanju iz helikoptera. Vježba je zamišljena tako što neko iz grupe turista koji su obilazili ovaj lokalitet, baca opušak neposredno pri ulasku u prostorije Starog grada zbog čega dolazi do paljenja suhe trave i niskog rastinja. Požar koji se širi veoma brzo zahvata i suverirnicu, a zbog panike turisti bježe prema višim spratovima kule, te se



Prevoz povrijeđenih sajlom

neki od njih penju i na najviše zidine kako bi se sklonili od dima. Ovu vježbu je uspješno organizirala Općinska služba civilne zaštite uz podršku načelnika općine Srebrenik Sanela Buljubašića. Međutim brojnim posmatračima ova vježba je podarila i jedan romantični događaj u kojem su glavni akteri Adela, jedan od "turista" koji su zaglavljani u starom gradu, i Almir, njen momak (sada već zaručnik) medicinar Gorske službe spašavanja Srebrenik. U toku izvođenja vježbe, na jednom od najviših zidina Starog grada, Almir je kleknuo pred Adelu i upitao je da li bi bila njegova životna saputnica?! Na oduševljenje svih učesnika u ovoj vježbi, ali i mnogih posmatrača, Adela je odmah pristala, te su od svih dobili gromoglasan aplauz. Trebalo joj je nekoliko minuta da shvati šta se zapravo desilo, pa su ubrzo nastavili sa izvođenjem ove vježbe. Da bi stvar učinio još ljepšom, Almir je Adelu u naručju iznio iz zidina Starog grada.



Pripadnici GSS stizu u pomoc

Policijci darovali djecu sa posebnim potrebama

U sklopu projekta „Rad policije u zajednici“ predstavnici Policijske stanice Srebrenik su dana 17.07.2013.godine organizovali i sproveli akciju „Ja darujem sok“ te s tim u vezi izvršili obilazak Centra za dnevni boravak djece sa posebnim potrebama u Srebreniku koji inače djeluje u okviru Udruženja građana penzionera i civilnih invalida I i II kategorije Općine Srebrenik, gdje su kroz jednosatno druženje sa štičenicima ovog Centra, ukratko predstavili Policijsku stanicu Srebrenik i zanimanje policajac te kroz razgovor sa Džanić Enesom, predsjednikom Udruženja prikupili određene informacije o radu Centra. Bila je ovo prilika, posebno za najmlađe štićenike Centra, da se možda i po prvi put susretnu sa policajcem a predstavnici Policijske stanice



Detalj sa posjete



Predstavnik PS Srebrenik sa najmlađim štičenicima Centra

Srebrenik su još jednim „humanim gestom“ pokazali da nisu zaboravili ni ovu kategoriju naših sugrađana, te skromnom donacijom u sokovima i slatkisima pokušali da koliko-toliko pomognu štičenicima u pogledu osvježanja naročito u ove tople ljetne dane. Izgradnja Centra za dnevni boravak djece sa posebnim potrebama u Srebreniku inače finansirana je od strane Općine Srebrenik, UNDP-a BiH i Ministarstva za rad i socijalnu politiku TK-a a u istom su planirane aktivnosti za oko 70 djece. Svakodnevno u Centru boravi od 10 do 15 djece a osoblje koje radi sa djecom je uglavnom na volonterskoj osnovi. Kako finansiranje Centra nije definisano a Udruženje ne raspolaže sredstvima za tu namjenu, svaki vid donacije je dobrodošao. Predstavnici Policijske stanice Srebrenik planiraju da i u narednom periodu, kroz projekat „Rad policije u zajednici“, naročito u saradnji sa drugim institucijama, podrže rad ove ustanove.

Promovisana knjiga „Predslavenski korijeni Bošnjaka“ autora prof. dr. Ibrahima Pašića

Dana 24.05.2013.godine, u organizaciji BZK Preporod OO Srebrenik, u Plavoj sali Doma kulture u Srebreniku, pred oko 80 prisutnih građana, među kojima su bili najbrojniji profesori i učenici Prve osnovne škole i Mješovite srednje škole iz Srebrenika, održana je promocija knjige „Predslavenski korijeni Bošnjaka“ autora akademika prof. dr. Ibrahima Pašića. Višedecenijskim proučavanjem i upotrebom multidisciplinarnog pristupa dr. Pašić je prikupio brojne dokaze, dokumenta i činjenice, koji bacaju posve drugo svjetlo na porijeklo Bošnjaka. Ova knjiga Bošnjake, a tu mislim i na autohtone bosanske katolike i pravoslavce, vraća u tu daleku prošlost koja nam je vrlo malo poznata, kazao je prof. dr. Ibrahim Pašić, autor ovog historiografskog djela, kojeg mnogi smatraju kapitalnim naučnim djelom nakon rata u BiH. U dvije knjige, čija je promocija upriličena i u Srebreniku, profesor Pašić naučno dokazuje čvrstu vezu stanovnika BiH sa svojim precima Ilirima, govori o glasilačkoj ilirskoj kulturi, crkvi bosanskoj, te razotkriva historijske falsifikate na kojima su obrazovane generacije ljudi. Prof. Pašić je projekt "Predslavenski korijeni Bošnjaka" započeo prije 15 godina, a tokom prigodnog predavanja je skrenuo pažnju da je Institut u Švicarskoj ispitivao etničko porijeklo naroda Evrope, pa tako i naroda u BiH i njihovih susjeda. Prema tom istraživanju geni stanovnika BiH su 40 posto ilirski, 20 posto gotski, 15 posto keltski, 15 posto slavenski, 6 posto hunski i 4 posto trački. Kako je Pašić istakao, trački element se može naći samo kod stanovnika BiH a nema ga kod stanovništva susjednih država. Promotori knjige u Srebreniku bili su prof. dr. Senadin Lavić te mg. Nermin Tursić, predsjednik BZK „Preporod“ OO Srebrenik. – „Imate priliku da se upoznate sa ovom knjigom koja je nastala kao



Detalj sa promocije knjige

nužna potreba jer Bošnjaci, iako pripadaju jednom od najstarijih naroda u Evropi, najmanje znaju svoju historiju. Prof. Pašić u ovom djelu dokazuje kako u etnogenezi Bošnjaka dominantnu ulogu igraju i ilirski, keltski i gotski korijeni, kao i ostavština drugih naroda, koji su nastanjivali ove prostore u dalekoj historiji. Svojim "visokim naučnim nivoom i kriterijima naučnog istraživanja" prof. dr. Pašić je uspio da dokaže da mi zaista jesmo svoji na svome, a odlučan je i u demontiranju svih historiografskih falsifikata i pokušaja da se Bošnjaci prikažu tek kao ostaci otomanske imperije, da im se ospori pravo na BiH, a samoj zemlji pravo na hiljadugodišnju državnost i posebnost- kazao je prof. dr. Senadin Lavić. U pauzama predavanja učenici navedenih škola su se predstavili prigodnim kulturno-umjetničkim programom.

3D projekcije filmova u srebreničkom kinu



Za obje projekcije tražila se karta više

Krajem maja 2013.godine po prvi put u historiji Srebrenika u Kino sali srebreničkog Doma kulture prikazani su filmovi u 3D tehnici. Brojni ljubitelji sedme umjetnosti imali su priliku uživati u filmovima u trodimenzionalnoj digitalnoj tehnici zahvaljujući saradnji JU Centar za kulturu i informisanje s filmskom kućom „Oskar“ iz Banja Luke. Interesovanje srebreničke publike prevazišlo je i najoptimističnija predviđanja, o čemu svjedoči i podatak da je prvog dana, dvije projekcije pratilo 850 posjetilaca. Za obje projekcije tražila se karta više, tako da je Kino sala Doma kulture u Srebreniku bila pretijesna da primi sve one koji su htjeli uživati u projekcijama filmova u 3D tehnici. Prema riječima Mirze Ibrišimovića, v.d. direktora Centra za kulturu i informisanje Srebrenik, zbog velikog interesovanja publike, u toku ljetne sezone dva puta mjesečno će se organizovati po dvije projekcije filmova u 3D tehnici, a već s početkom nove školske godine, i puno češće.

„Srebrenik-stoni grad“ na 10. Međunarodnom film festivalu „Srce Slavonije“

U sklopu 4. Manifestacije Đakovački rezovi u gradu Đakovu (Republika Hrvatska) od 26. do 28. juna 2013. godine održan je 10. Međunarodni Etno film festival – Srce Slavonije, na kojoj se 18 odabranih filmova sa etno tematikom takmičilo za osvajanje nagrade „Zlatno srce Slavonije“. Film „Srebrenik-stoni grad“ autora Razima Slanjankića, šefa Službe za boračko-invalidsku zaštitu u općini Srebrenik, je bio u konkurenciji za ovu filmsku nagradu. Iako nije osvojio nagradu film je dobio pozitivne ocjene filmskih kritičara, a u svakom slučaju bila je to još jedna prilika za kvalitetnu promociju Srebrenika i njegove kulturno-historijske baštine. – „Trajanje i tehnika snimanja nisu zadani. Naš je cilj ovim festivalom bio stvoriti kreativnu i opuštenu atmosferu za razmjenu ideja i jedinstveno i prepoznatljivo mjesto susreta s filmskom industrijom koja oživljava stare običaje i kulturu.“- istakla je Sanja Bježančević, predsjednica Manifestacije Đakovački rezovi.



Detalj iz filma

U Galeriji GM održana izložba slika Senaida Buljubašića



Strajo Krsmanović, Senaid Buljubašić i Enver Mandžić

Dana 28.05.2013.godine u Galeriji GM (Galerija Mandžić) u Tuzli, prvoj privatnoj i namjenski izgrađenoj likovnoj galeriji, vlasništvo akademika prof. dr. Envera Mandžića, održana je izložba slika akademskog grafičara Senaida Buljubašića iz Srebrenika. Kako je istaknuto na ceremoniji otvorenja, radi se o svojevrsnom slikarskom buntu, prenijetom na platno. Kroz jaku ekspresiju Buljubašić govori o životu, pobuni i funkciji umjetnika u nemirenju sa svakodnevnicom. Izložba je posebna po tome da je tridesetak velikih formata nastalo u samo nekoliko mjeseci. –„Ova likovna djela nose u sebi puno značenje ljudskog tijela i ako prikazuju samo jedan ekstremni dio tijela, koje je odvojeno od podloge, gdje se dobiva utisak da tijelo lebdi u prostoru, uzdignuto u svom duhovnom stanju. To je izraz intimnih osjećanja i specifičnog duhovnog stanja kada kroz slike Buljubašić izražava svu složenost ljudskog bića i jedne unutrašnje istine (starosti na primjer), koja se mora izvesti iz spoljašnjeg izgleda naslikanog detalja (noga, ruka).

Svaki rad predstavlja istinsku virtuoznost likovne tehnike Buljubašića.“ –istakao je profesor Mandžić prilikom otvorenja izložbe slika. Likovnu izložbu je otvorio profesor Strajo Krsmanović, direktor Nacionalne umjetničke galerije BiH, a govoreći o autoru, slikama i izložbi kazao je kako je snaga umjetnosti izuzetna, kako spaja ljude sa pozitivnom energijom, gradi prijateljstva i ljudima daje snagu da prave značajna djela, što je očito i iz ovih likovnih djela Senaida Buljubašića. Senaid Buljubašić rođen je 28.10.1956. u Donjim Moranjcima, općina Srebrenik, Bosna i Hercegovina. Nakon završene Škole za primijenjenu umjetnost diplomirao je grafiku na Akademiji likovnih umjetnosti u Sarajevu, u klasi prof. Dževada Hoze. Radio je kao animator na TV Sarajevo, a od 1985. zaposlen je u JU „Centar za kulturu i informisanje“ Srebrenik kao rukovodilac umjetničke manifestacije „OGUS“. Član je ULUBiH-a, ULUTK i HDLU Vinkovci. Sudjelovao je na 59 kolektivnih, 11 samostalnih izložbi te 16 likovnih kolonija. Do sada je ostvario zapažene rezultate i dobio brojne nagrade, diplome i priznanja.



Detalj sa izložbe slika

Održana 5. likovna kolonija „Majevica 2013“



Učesnici 5. likovne kolonije "Majevica 2013"

Na privatnom imanju Svjetlana Bešića, slikara iz Srebrenika, održana je 5. likovna kolonija „Majevica 2013“, koja je i ove godine okupila četrnaest umjetnika iz zemalja regiona. Podsjetimo, likovna kolonija „Majevica“ pokrenuta je 2008. godine pod motom „umjetnici spašavaju Majevicu“, tako da je aktivan odnos slikara prema prirodi ostao jedan od najvažnijih razloga organiziranja ove likovne kolonije: –Želimo pokazati da umjetnost prelazi granice država, da nadilazi ljudsku sebičnost koju čovjek pokazuje prema prirodi. Pored toga, već petu godinu uspijevamo podariti gradu Srebreniku jednodnevnici praznik umjetnosti, istakao je Svjetlan Bešić. Slike nastale na ovoj koloniji bit će predstavljene na izložbi koja će se u februaru 2014. godine, u okviru Manifestacije Dani povelje, organizirati u Srebreniku. (foto: Svjetlan Bešić)



Detalji sa likovne kolonije „Majevica 2013“



Održano Veče saza, sevdaha i etno muzike



Detalj sa nastupa sazlija

Dana 18.06.2013.g. u sklopu obilježavanja 21. juna, Dana općine Srebrenik, članovi Bošnjačke zajednice kulture „Preporod“ Srebrenik su na ljetnoj pozornici Doma kulture održali „Veče saza, sevdaha i etno muzike“. Oko 80 posjetilaca imalo je priliku vidjeti nastup folklorne sekcije Gradskog teatra Srebrenik te nastup nekoliko domaćih umjetnika na sazu kao i nastup uglednih gostiju i jednih od najboljih sazlija u BiH: Rajka Simeunovića iz Bijeljine i mladog Jusufa Brkića iz Gradačca, koji su im priredili sat vremena raznovrsnog i kvalitetnog kulturno-zabavnog programa. Na samom početku programa posjetitelje je pozdravio i najmlađi sazlija Amar Muratović koji ima samo sedam godina. Prisutnima se obratio i predsjednik udruženja sazlija Srebrenik Razim Slanjankić, koji je istakao važnost održavanja ovakvih događaja, kako bi se naše kulturne vrijednosti poput sevdalinke i saza pokušale otgnuti od zaborava. - Sevdalinka predstavlja jedinstven narodni muzički izraz u Bosni i Hercegovini, koji se može pohvaliti dugom i bogatom tradicijom. Sevdalinka, saz te narodne igre i kola iz Bosne su dio naše tradicije, a samim tim dio onoga što mi jesmo. Mislim da ih je jako bitno očuvati od zaborava i učiniti da budu pristupačniji današnjici, a posebno mladim ljudima-istakao je Slanjankić. (foto: Svjetlan Bešić)

Srebreniku od srca: "Zefir" ostavio prisutne bez daha

U sklopu obilježavanja 21. juna, Dana općine Srebrenik, na ljetnoj pozornici ispred Doma kulture u Srebreniku, Ansambl „Zefir“ iz Srebrenika održao je veličanstveni koncert sevdaha pod nazivom „Srebreniku od srca“. Nakon nekoliko nastupa u Tuzli, Gračanici, Gradačcu i dr. gradovima u BiH, „Zefir“ je još jednom napunio pluća stanovnicima općine Srebrenik, ali i onim gostima koji su došli da uživaju u dvosatnoj izvedbi mladih muzičara. Predvođeni dirigentom Jasminom Brašnji-



Nastup Jasmina Hasića



Nastup Melike Moranjkić

ćem sjajno uštimani orkestar sa horom i mladom plejadom budućih zvijezda, predstavio se sa nekoliko odličnih sevdalinki. "Domaće snage" koja puno obećavaju poput Melike Moranjkić, zatim Elme Hadžić, Jasmina Hasića te Mirze Selimovića, upotpunili su i specijalni gosti, doktori Nedžmija i Admir Suljić, pokazujući da tradicija neće niti smije biti zaboravljena u Srebreniku ali i u cijeloj BiH. Koncert su uveličali brojni gosti iz društveno-političkog života od načelnika Sanela Buljubašića i predsjedavajuće OV-a Vesne Veselić, do sportista, profesora, umjetnika... (foto: Damir Mehmedović)



Nastup dr. Nedžmije i Admira Suljića

Pozorišna predstava „Put po svijetu“



Detalj sa predstave

Dana 25.08.2013.godine, u okviru kulturne manifestacije OGUS 2013, u kino sali srebreničkog Doma kulture održana je pozorišna predstava "Put po svijetu" u izvedbi mladih glumaca iz Belog Manastira. Predstava je jedna zanimljiva avanturistička priča za djecu i odrasle u kojoj troje mališana, sa svojim putujućim pozorištem, obilaze svijet i susreću se raznim likovima kao što su Alibaba, Aladin, Romeo i Julija, Bik koji sjedi itd. Mladi glumci iz Belog Manastira su u jednosatnoj predstavi obišli sedam zemalja i promijenili nekoliko uloga i kostima uz prateću muziku i efekte, a poruka ove predstave je da dječija mašta zaista može svašta.

Izložba „Genocid u Srebrenici“ i promocija knjige „Pod zastavom UN-a“



Detalj sa promocije knjige "Pod zastavom UN-a"

Dana 07.07.2013.godine u JU "Centra za kulturu i informisanje" Srebrenik, u okviru obilježavanja "Dana Srebrenice" i genocida nad Bošnjacima Podrinja, Bošnjačka zajednica kulture "Preporod" OO Srebrenik, organizovala je izložbu fotografija „Genocid u Srebrenici“ i promociju knjige „Pod zastavom UN-a“. Arhiv Tuzlanskog kantona je na promociji predstavio izložbu fotografija na temu "Genocid u Srebrenici", autora doc. dr. Izeta Šabotića i Ešefa Begovića, a promovisana je i knjiga "Pod zastavom UN-a - Međunarodna zajednica i zločin u Srebrenici" autora Hasana Nuhanovića, prevodioca holandskog bataljona u Srebrenici - Potočarima 1992 - 1995. godine. O izložbi fotografija, njenom nastajanju i autorima je govorio Omer Zulić, prof. historije, uposlenik Arhiva TK-a, koji je istakao da je i ova izložba dio naših nastojanja da, uvijek i iznova, podsjećamo i sebe i druge o

Podrinju, Srebrenici i julu 1995. godine, kada su srpski fašisti nad nevinim i golorukim narodom Podrinja počinili masovne zločine, koji su i pred Međunarodnim sudom u Hagu okarakterisani kao genocid. O knjizi su govorili, mr.sci. Nermin Tursić, predsjednik BZK "Preporod" OO Srebrenik, i doc. dr. Izet Šabotić, direktor Arhiva TK-a, istakavši da je za historiju i Bošnjake nemjerljiv značaj i vrijednost onoga što je u svojoj knjizi zapisao njen autor. Hasan Nuhanović je direktni sudionik i živi svjedok svih dešavanja u Podrinju u toku 1992 - 1995. godine, kada je kao uposlenik UN-a i prevodilac holandskog bataljona svojim očima i ušima vidio i pratio sva dešavanja, nesposobnost, licemjerstvo međunarodne zajednice i trupa UN-a, kao i razvoj situacije koja je dovela do najvećeg pokolja i genocida civilnog stanovništva u historiji Evrope, od drugog svjetskog rata, koje je bilo pod "zaštitom trupa UN-a". Sam autor je prisutnima govorio o svojim iskustvima iz Srebrenice i Potočara, o golgoti koju je prolazio narod Podrinja tokom svih godina rata, o dešavanjima u julu 1995. godine, kao i o nastajanju i pisanju ove knjige, njegovim svjedočenjima pred sudom u Den Hagu. Hasan Nuhanović je svoju životnu priču stavio na papir u obliku knjige, i podkriepio je sa dosta dokumenata i fotografija. Ona je izuzetno bitno i jedinstveno svjedočenje samog autora o dešavanjima u Podrinju i Srebrenici tokom agresije na Bosnu i Hercegovinu, uoči i za vrijeme dešavanja u i ispred baze UN-a u Potočarima, a koje svaki Bošnjak i svaki normalan čovjek ovoga svijeta, treba i mora pročitati i znati, kako istina o Srebrenici nikada ne bi bila zaboravljena. To je dug i obaveza svih nas Bošnjaka, i svih poštenih ljudi koji imaju dušu, srce i bar malo obraza i ljudskosti, prema svim nedužnim žrtvama Srebrenice, Podrinja i Bosne i Hercegovine. Nakon izložbe i promocije, prisutni su dugo razgovarali sa autorima uz konstataciju da se nikada i nikome više ne ponovi Srebrenica. (foto: Svjetlan Bešić)

"Zefir" sa gostima najavio dolazak najodabranijeg mjeseca



Ansambli Zefir iz Srebrenika



Hor Preporod Modling Vienna Austrija



Hor Selimija iz Doboja

Predramazanskim koncertom "Na krilima Ramazana" koji je održan 06.07.2013.godine u Srebreniku, najavljen je dolazak Ramazana kod muslimana. U organizaciji udruženja mladih "ZEFIR" iz Srebrenika i Medžlisa Islamske zajednice Srebrenik, na ovom velikom koncertu učestvovali su hor "Selimija" iz Doboja, Omladinski Ansambli iz Tešnja, Omladinski hor Preporod Mödling - Vienna Austrija te organizatori koncerta Ansambli "Zefir" iz Srebrenika, koji su svojim izvedbama oduševili više od 500 prisutnih gostiju. Ovo je bila treća smotra horova u Srebreniku, a organizatori vjeruju da bi trebala preći i u tradiciju jer je iz godine u godinu sve bolje prihvaćena među stanovništvom Srebrenika. Prvi je nastupio Ansambli "Zefir" Srebrenik kao domaćin, koji se predstavio sa četiri ilahije, a zatim Hor Preporod Modling Vienna Austrija, Omladinski Ansambli Tešanj te hor "Selimija" iz Doboja. (foto: Sadik Hodžić)



Omladinski ansambl iz Tešnja

Svečano otvoren „OGUS 2013“



OGUS 2013 je zvanično otvorio načelnik Sanel Buljubašić

Dana 24.08.2013.g. od 19 sati, na lokalitetu „Čekrk“ u blizini Starog grada Srebrenika iz 1333.godine u G. Srebreniku, zvanično je otvorena kulturna manifestacija „OGUS 2013“ (Srebrenik otvoreni grad umjetnosti), koja se tradicionalno obilježava još od davne 1977. godine. Pred nekoliko stotina posjetilaca, zvucima zurlaša i nastupom kulturno-umjetničkih društava, započeo je i ovogodišnji OGUS, a nakon uvodnih zvuka iz frula, zurla i bubnjeva domaćih svirača, te izvedbom spleta narodnih kola i igara, gostima se obratio općinski načelnik Sanel Buljubašić koji je, nakon kratkog govora, svečano otvorio manifestaciju OGUS 2013. Načelnik Buljubašić je između ostalog kazao: –„Iz godine u godinu smo svjedoci kako umjetnici sa raznih strana svijeta dolaze u Srebrenik, a i sinoć smo dočekali nove umjetnike, koji će likovnim djelima, nastalim u ovom predivnom mjestu Srebreniku, obogatiti našu kulturnu ponudu. OGUS je postao prepoznatljiva kulturna manifestacija na području TK-a i BiH, uspješno se obilježava sada već 36 godina, a cilj nam je da ga promoviramo i van granica BiH. Tokom sedam dana koliko traje OGUS, Srebrenik posjeti veliki broj kako domaćih tako i stranih turista. I pored teške ekonomske situacije trudimo se da svake godine izdvojimo određena novčana sredstva, kako bi ova mogla građanima ponuditi niz, kako već standardnih tako i novih, kulturnih sadržaja, među kojima svatko može pronaći nešto što će ga zanimati. Stari grad Srebrenik je jedan od najočuvanijih spomenika i predstavlja bitnu stavku kada je u pitanju turistička ponuda našeg grada,

na čijoj strategiji razvoja svakodnevno radimo. U budućnosti planiramo da pravimo sadržaje i oko same tvrđave, što radimo i ovaj put na lokalitetu „Čekrk“. Svi putevi koji vode do nje, govore da je život u ranijem periodu bio ne samo na tvrđavi, nego i oko nje. Zapravo, takva ponuda u svijetu je hit, zato i mi planiramo da se razvijamo u tom pravcu“. Nakon zvaničnog otvorenja OGUS-a 2013 izvedena je muzičko-scenska izvedba „Mušanov san“, scenariste Sadila Mehmedovića, koji je, uz Dženanu Džanić i dio režiserskog tima. Pred nekoliko stotina posjetilaca nastupile su domaće snage: Siniša kahvić, Damir Mašić, Dražen Pavlović, Dženana Džanić, Jasmina Dedić, Selma Hasanović, Edisa Suljkanović, Faruk Smajlović... Događaj je upotpunjen već tradicionalnim nastupom zurlaša, sazlija, kulturno-umjetničkih društava, koja su se predstavila spletom narodnih kola i igara, dok su mladi bili oduševljeni nastupom članova plesne škole „Rebus“. Sat ranije tj. od 18 sati, uz zvanični, po prvi put, je održan i revijalni dio programa, gdje su se posjetilci nadmetali u raznim tradicionalnim disciplinama, a upriličena je i izložba tradicionalnih zanata na otvorenom. U sklopu revijalnog dijela svečanog otvorenja najmlađi su imali priliku da nauče prve plesne korake uz hip hop dance plesne škole „Rebus“, jahali su ponija, igrali se s klovnovima, te učestvovali u brojnim dječijim takmičenjima, po čemu je ovogodišnji čin otvorenja OGUS-a, za mnoge, bio pravo osvježanje.



Detalj sa otvorenja OGUS-a 2013

Promocija knjige „Pamćenje vremena, ljudi i događaja“

Dana 26.08.2013.godine, u okviru kulturne manifestacije OGUS 2013, u Plavoj sali srebreničkog Doma kulture održana je promocija knjige „Pamćenje vremena, ljudi i događaja“ autora prof. dr. Edhema Muftića. Promotori knjige su bili: mr. Munib Efendić iz Lukavca, Zlatko Dukić - novinar i književnik iz Tuzle te prof. Enver Mehmedović iz Srebrenika. Mnoštvo naučnih radova i studija, te četiri knjige je ono što je prethodilo pisanju pete knjige „Pamćenje vremena, ljudi i događaja“ koja prema riječima autora prof. dr. Edhema Muftića, fragmentarno opisuje sve ono što je prošao, doživio od djetinjstva do današnjih dana. „Ja sam zapravo htio da napravim nešto intimno, vezano za porodicu i za svoj životni put. Međutim, kada sam prvi dio teksta odnio književniku Atifu Kujundžiću, on mi je kazao da to obavezno pretočim u knjigu. Da to budu neka vrsta sjećanja na život, ljude i događaje.“. Prema riječima prof. dr. Edhema Muftića tri su ključne stvari, odnosno, segmenta njegovog života o kojima knjiga govori: školovanje, život i porodica, te političko djelovanje. U jednom dijelu knjige spominje se i naselje Špionica u općini Srebrenik, sa posebnim naglaskom na miran i kvalitetan suživot pripadnika svih nacija i vjeroispovijesti na ovom prostoru. Svi promotori su



Detalj sa promocije knjige

govorili o značaju ovog književnog djela, ali i o samom autoru istakavši kako se radi o obrazovanom i kulturnom čovjeku, pravom gospodinu koji sve radi sa velikim zadovoljstvom, sa velikim znanjem i upornošću. Ova knjiga je puna impresija, puna utisaka, doživljaja, puna je ekspresija na vrijeme koje je prošlo. (foto: Osman Mujkić)

Održano „Veče sevdaha“

Koncert Mirze Selimovića



Detalj sa "Večeri sevdaha"

Dana 25.08.2013.godine, u okviru kulturne manifestacije OGUS 2013, u kino sali srebreničkog Doma kulture održano je „Veče sevdaha“, cjelovečernji koncert sevdalinke na kojem su se brojnim posjetiocima predstavili članovi novoosnovanog Udruženja „Sevdah koncept“ iz Srebrenika. Dvadesetak izvođača različite starosne dobi predstavilo je svoje umijeće u interpretaciji sevdalinke, a prisustvo blizu 500 posjetilaca potvrđuje da neprevaziđeni bh. sevdah još uvijek ima brojne poklonike. (foto: Svjetlan Bešić)

Dana 27.08.2013.godine, u sklopu „OGUS 2013“, na ljetnoj pozornici ispred Doma kulture u Srebreniku održan je cjelovečernji koncert Mirze Selimovića, talentovanog pjevača iz Srebrenika, pod nazivom „Srebreniku, s ljubavlju“. Brojna publika je bila oduševljena onim što je imala priliku čuti, ali i vidjeti, s obzirom da su cijeli koncert pratili specijalni svjetlosni efekti, koji su, uz besprijekornu interpretaciju Mirze Selimovića, dali kompletan koncertni ugođaj dostojan nastupa velikih zvijezda. Podsjetimo, pažnju domaće javnosti Mirza je privukao učešćem u muzičkom showu „Zvijezda možeš biti ti“ TV Hayat, kada je dobio najviše glasova publike, a žiri mu je dodijelio drugo mjesto. Gosti koncerta bili su popularni srebrenički bend GBK (Generacija bez kompasa) i finalista ZMBT4 Momir Bogdanović. (foto: Svjetlan Bešić)



Nastup Mirze Selimovića

Koncert međunarodnog orkestra „BalsiKa“ iz Tuzle

Održano "Veče Brčko distrikta BiH"



Nastup orkestra Balsika u Srebreniku

Dana 29.08.2013.godine, na ljetnoj pozornici Doma kulture Srebrenik, u okviru manifestacije „OGUS 2013“, održano je „Veče Brčko distrikta BiH“. Ovo veče obilježilo je nastup pjevača i folklora iz Brčko distrikta BiH, a vrhunac bogatog programa, pripremljenog za srebreničku publiku, bio je nastup zvijezde folk muzike Nihada Kantića Šiketa, koji duže vrijeme živi i radi u Brčkom, ali koji ne zaboravlja svoj rodni grad i koji je za ovu priliku pripremio poseban repertoar pjesama iz bogate diskografije. Uz to, Šike je naglasio da je zaista sretan što nastupa u okviru kulturne manifestacije, koja je druga u BiH po dužini trajanja. Ni ovaj put, očekivano, nije razočarao publiku svih starosnih dobi, koja je zajedno s njim pjevala njegove nezaboravne hitove, kao i hitove drugih pjevača. I ovo druženje u okviru OGUS-a, i pored kišovitog i prohladnog vremena, obilježeno je dobrom posjetom. (foto: Svjetlan Bešić)

Dana 28.08.2013.g., u sklopu manifestacije OGUS 2013, na ljetnoj pozornici ispred Doma kulture u Srebreniku, održan je koncert međunarodnog orkestra „BalsiKa“ iz Tuzle. Orkestar je izveo tradicionalne pjesme jugoistočne Europe aranžirane i pripremljene za različite instrumente od jednostavnih do težih dionica, što je pjesme učinilo pristupačnima i mladima sa malo muzičkog iskustva. Inače, članovi orkestra sviraju violine, gitare, klavir, saxofon, flautu, udaraljke, harmonike i klarinet. BalsiKa kao projekat koji simbolizira multikulturalnost, koji spaja mlade različitog uzrasta, nacije i konfesije, ima za cilj da proširi svoje djelovanje na zemlje u regionu. BalsiKa je međunarodni orkestar koji je nastao saradnjom entuzijasta dva grada, Tuzle i Strasbourg-a (FR), orkestar koji se razvio iz malog vokalnog instrumentalnog ansambla u nestandardni orkestar koji okuplja preko 40-ak mladih ljudi u starosnoj dobi od 15-23 godine. Orkestar vode paralelno u Strasbourg-u i Tuzli dvojica gitarista J.C.Chojcan (Žan Klod Šoškan) i Nedim Tinjić. Uspješnim koncertom u Srebreniku potvrđeno je da ideja samog projekta BalsiKe, a to je povezivanje mladih ljudi iz različitih zemalja, različitih godina i konfesija, opstaje. (foto: Svjetlan Bešić)



Nastup Nihada Kantića Šiketa

Održana izložba grafika iz fundusa galerije BiH te manifestacija „Vinkovačko veče“



Izložbu grafika je otvorio načelnik Sanel Buljubašić

Dana 30.08.2013.godine u 18 sati, u holu Doma kulture u Srebreniku, održana je izložba grafika iz fundusa galerije BiH na kojoj su prikazana neka djela eminentnih grafičara: Emira Dragulja, Halila Tikveše i Dževada Hoze. Izložbu je otvorio općinski načelnik Sanel Buljubašić, a o kakvoj izložbi se radi dovoljno govore neka od izloženih djela, koja su danas antologijske vrijednosti. Navedeni grafičari kao i niz drugih uspješnih autora afirmirala je bh. grafiku u Evropi, osvajajući najprestižnija priznanja na međunarodnim izložbama. Samo ih je Emir Dragulj osvojio tridesetak. Dževad Hozo je tako otkrivao nove mogućnosti grafike u reljefnom fotobakropisu, dok Emir Dragulj, kroz ublažene kontraste svjetla i sjene, dostiže likovne efekte slikarstva, a potom i fotografije, a materija i motivi su kao predmet grafike sa snagom materijalizacije i tonskim rafinmanom. U nastavku večeri od 19 sati, na ljetnoj pozornici Doma kulture Srebrenik, upriličeno je „Vinkovačko veče“. U okviru programa posjetioci su se predstavili članovi tamburaškog orkestra „Dike“ iz Vinkovaca, koji slave 27. godina uspješnog rada i koji su izvedbom pjesama iz Slavonije, kao i vlastitim obradama



Detalj sa izložbe grafika

sevdalinki, oduševili posjetioce. Pored građana općine Srebrenik, već tradicionalnom nastupu tamburaša iz Vinkovaca, prisustvovao je načelnik Buljubašić te gradonačelnik Vinkovaca dr. Mladen Karlić sa saradnicima. (foto: Svjetlan Bešić).



Nastup tamburaškog orkestra "Dike"

Djeca crtala, pjevala i plesala svome gradu

Dana 31.08.2013.godine organizovana je manifestacija pod nazivom „Djeca slikaju, pjevaju i plešu svom gradu“. U ljetnoj bašti Doma kulture Srebrenik, na rolni papira dugačkoj oko 80 metara, srebrenička mladost pretočila je svoju maštu i kreativnost, koja će biti sačuvana u fundusu OGUS-a. Njihov trud i napor, slatkišima koje je obezbijedio TC „Belamionix“ Srebrenik, nagradili su gosti – likovni umjetnici, koji su i ove godine ostavili vrijedna umjetnička djela našem gradu. Nakon toga, na ljetnoj pozornici, pjevajući poznate hitove, brojnoj publici su se predstavili mladi muzički talenti našeg grada. Uz muzičku pratnju Faruka Smajlovića pjevali su: Elma Hadžić, Aida Šiljić, Semil



Plesna škola "Rebus" iz Srebrenika



Nastup mladih muzičkih talenata

Dedić, Melika Moranjkić, Ajla Nukić, Amar Salkić, Lejla Zahirović, Ajla Dedić i Amar Muratović. Kroz sve dječije aktivnosti učesnike i publiku vodili su Lejla Ibrišimović i Toni Babić. Veliko oduševljenje izazvali su članovi Plesne škole „Rebus“ Srebrenik koji su na ljetnoj pozornici pokazali spektakularne plesne akrobacije, a potom je koordinatrica plesne škole Arijana Moranjkić, pozvala publiku da zajedno zaplešu, te zahvalila na ukazanoj prilici uz obećanje da će i dalje neumorno raditi, kako bi svom gradu i novim naraštajima uvijek poklanjali samo najbolje. Članovi plesne škole „Rebus“ su, nakon toga, zajedno s publikom plesali skoro sat vremena. Svim učesnicima organizator je uručio zaslužene zahvalnice. (foto: Osman Mujkić)

Igrom i pjesmom zatvoren „OGUS 2013“



KUD "Mehmed Ibrahimović" Srebrenik

Dana 01.09.2013. godine u sklopu tradicionalne kulturne



Udruženje "Stara sinija" iz Gornjih Hrgova

manifestacije „OGUS 2013“ održano je večer uz BZK „Preporod Srebrenik, KUD „Mehmed Ibrahimović“ Srebrenik, „Gradski folklorni ansambl“ Srebrenik, Uduženje „Stara sinija“ G.Hrgovi i Udruženje mladih Tinja. Na ljetnoj pozornici Doma kulture Srebrenik, su uz zvuke saza, ugođaj smotre kulturno – umjetničkog stvaralaštva upotpunili Ahmet Hogić-Beca, Osman Suljkanović i Rajko Simeunović. Publika je uživala u raznolikosti narodnih nošnji, spletova igara i dobroj pjesmi, čime je na najljepši način stavljen na sve ono što se zbivalo u proteklih sedam dana u okviru OGUS-a 2013. Pokazali smo još jednom da raspolažemo sa, zaista bogatim umjetničkim potencijalom, koji je spreman iznijeti i najzahtjevnije manifestacije i prezentovati svu umjetničku ljepotu našeg grada. Zadovoljni mogu biti i organizatori, s obzirom da je, i pored teške finansijske situacije, sve proteklo na vrhunskom nivou, uz izuzetno dobru posjetu publike, koja je opet zadovoljna sadržajima manifestacije koji su okarakterisani i kao pravo osvježanje. Učesnici, takođe ne kriju zadovoljstvo što su doprinijeli tome da u svijet ode prava, lijepa slika Srebrenika, kao grada koji baštini kulturu i tradiciju svog naroda. (radiosrebrenik.ba)



Gradski folklorni ansambl Srebrenik

Damir ef. Babajić promovisao knjigu u Srebreniku



Promocija knjige Damira ef. Babajića

Dana 23.08.2013.godine u organizaciji BZK „Preporod“ Srebrenik, u prepunoj Plavoj Sali srebreničkog Doma kulture, održana je promocija knjige „Moj pogled na život iz kolica“, autora Damira ef. Babajića iz Rašljeve kod Gračanice. Osim autora, o ovoj publikaciji govorili su i Edib Kravić, Haris Mehmedović, mr. Senad Mehmedinović i mr. Nermin Tursić, dok

je uvodničar bio Haris-ef Mehmedović. Oni su istakli da se autor odvažio da u knjigu pretoči svoje osjećaje u teškim trenucima nakon saobraćajne nezgode koja ga je prikovala za invalidska kolica. Ova knjiga ruši predrasude i ona je od velike informativne vrijednosti za osobe sa invaliditetom, a u njoj autor govori o četiri najteže godine u njegovom životu provedene u invalidskim kolicima i liječenju u Moskvi, ali i velikoj podršci dobrih ljudi zahvaljujući kojoj je uspio ponovo prohodati. Kako je rečeno na promociji, Damir ef. Babajić predstavlja svojevrsni medicinski fenomen, koji naučnici trebaju istraživati. Knjiga je velike vrijednosti i za naučne krugove, pogotovo za edukacijsko – rehabilitacijsku nauku – kazao je Mehmedinović, viši asistent na edukacijsko-rehabilitacijskom fakultetu u Tuzli. Nakon velikih iskušenja i dugotrajnog procesa liječenja, edukacije i rehabilitacije u Moskvi odbacio je invalidska kolica i ponovo stao na svoje noge. Svoja iskustva i trnovit životni put pretočio je u knjigu „Moj pogled na život iz kolica“, kojom, kako je istakao, želi poručiti ljudima da nikada ne trebaju gubiti nadu, te da u datoj situaciji i stanju, ma kakvo bilo, moraju pronaći smisao života, hrabrost i snagu. U svakom slučaju ovo je knjiga koja bi se trebala naći u svakoj kućnoj biblioteci. Iza efendije Babajića su osim navedene i dvije knjige koje obrađuju teološku tematiku „Ne gubite nadu u Allahovu milost“ i „Dovište Ratiš, nekad i sad“. Urednik knjige je Damirova supruga mr. Mirela Babajić, s kojom Damir ima dvoje djece.

U Gornjim Hrgovima održana manifestacija „Žetva 2013“



Detalj sa Žetve 2013

Dana 20.07. 2013. godine, po izuzetno lijepom i sunčanom vremenu, u srebreničkom naselju Gornji Hrgovi, održana je tradicionalna manifestacija "Žetva 2013". Jedinstvena manifestacija u BiH, i ove godine privukla je veliki broj posjetilaca iz Srebrenika i njegovih naselja, okolnih mjesta i gradova, kao i gostiju iz Hrvatske i Srbije. Ovo je i internacionalna manifestacija koja već godinama okuplja kosce i žeteoce iz Županje i Subotice, jer se slične manifestacije održavaju u Županji i u Subotici. Manifestacija "Žetva 2013" održana je pod pokroviteljstvom općine Srebrenik i općinskog načelnika Buljubašić Sanela te Turističke zajednice TK-a i njenog direktora Fazlić Nedreta. U ime načelnika općine Srebrenik kratko se obratio i manifestaciju zvanično otvorio, Damir Hodžić, savjetnik općinskog načelnika, a u ime organizatora i Udruge "Stara sinija" govorio je njen predsjednik Mato Marojević. Stoljećima su naši preci na ovim prostorima, vrijedno radili, a u ovom periodu godine želi svoje prve usjeve: pšenicu, raž, ječam, zob... Žuljevite i vrijedne ruke su od ove naše tvrde bosanske zemlje uspijevale, zalijevajući je znojem, dobiti hljebno žito za predstojeću zimu, kako bi nahranili svoju mnogobrojnu čeljad. Znali su i umjeli tada da se i provede, zapjevaju i zaigraju, dajući tome poseban značaj i ljepotu u njihovim težačkim životima i svakodnevnica.

Najbolji kosci i žeteoci su nakon pripreme i oštrenja svojih kosa, oko podneva oborili prve otkose zrele pšenice. Vesela pjesma rukovedalja, pratila je vješte i vrijedne kosce, slažući zrelu pšenicu iz otkosa u lijepo oblikovane snopove zlatnog žita. Nakon što je sva pšenica požnjevena, a bogati tradicionalni ručak na njivi bio pri kraju, snopovi pšenice su prevoženi i prenošeni do guvna i ubacivani u stari Dreš (mašinu koja je odvajala zrna pšenice od stabljika - vatljika) i ubrzo su prva zrna ovogodišnjeg bogatog uroda pšenice, počela da padaju u velike drvene posude. Vrijedne snaše su potom te drvene posude pune pšenice, nosile do vrlo stare Vihare (drvene naprave - mašine za odvajanje zrna pšenice od prašine i ostataka stabljika i pšeničnih vatljika) na razvijavanje, kako bi ostala čista pšenična zrna. Tako očišćena i otrijebljena pšenica je otpremljena do obližnje stare vodenice potočare, gdje se počelo sa mljevenjem brašna. A još vruće i tek samljeveno pšenično brašno, od prve ovogodišnje žetve, brzo se našlo u vrijednim rukama naših domaćica koje su, po starim i tradicionalnim receptima, pripremile tijesto i ispekle velike i nadaleko poznate hrgovače pogače i hljeb ispod peke i sača. Uz hljeb, domaći kajmak, sir, maslac, milijeko i meso, brojne kolače i obilje pića, domaćini i brojni gosti su se gostili narednih nekoliko sati (foto: Svjetlan Bešić).



Detalj sa Žetve 2013

Na Majevici održano druženje ljubitelja terenaca



Okupljanje vlasnika terenaca

U organizaciji Auto-moto kluba „Terenac 4x4“, u Gornjim Hrgovima kod Srebrenika, održani su revijalna vožnja i druženje ljubitelja terenaca iz Srebrenika, Brčkog, Kladnja, Banovića, Zvornika i Bosanskog Broda. Na sjevernim padinama planine Majevice okupilo se oko 150 ljubitelja četverotočkaša koji su, pred velikim brojem posjetilaca, prezentirali svoje vještine upravljanja moćnim terenskim vozilima. U sklopu jednodnevnog druženja organizirana je vožnja terenskim vozilima po blatnjavoj i izuzetno nepristupačnoj planinskoj stazi od Gornjih Hrgova do Ivoce vode, na samim vrhovima planine Majevice, u dužini od oko 20 kilometara. Na novoizgrađenom poligonu u Gornjim

Hrgovima, nakon toga, je održana tkz. vožnja spretnosti, na kojoj su ljubitelji terenaca prezentirali svoju hrabrost i vještine, od kojih je posjetiocima zastajao dah. Nakon prezentacije vještine upravljanja moćnim terencima, nastavljeno je druženje domaćina i njihovih gostiju, koje je potrajalo do večernjih sati. –Ovo revijalno druženje organizirali smo s ciljem promocije i afirmacije auto-moto sporta, ali i tkz. off-road turizma, koji ima sve više poklonika u zemljama EU. Na taj način posjetiocima ćemo približiti prirodne ljepote planine Majevice, ali i srednjovjekovnu tvrđavu u Gornjem Srebreniku-ističe Željko Babić, predsjednik Auto-moto kluba „Terenac 4x4“. (tekst: Osman Mujkić, foto: Vlado Ilić)



Detalj sa druženja ljubitelja terenaca

Ispraćena 33. generacija maturanata MSŠ Srebrenik



Samra Hirkić-učenica generacije MSŠ Srebrenik

Dana 30.05.2013.godine svečano je ispraćena 33. generacija maturanata Mješovite srednje škole (MSŠ) Srebrenik. Ove školske godine u MSŠ Srebrenik, srednje obrazovanje je završilo 457 maturanata. Nakon tradicionalnog defilea, pred velikim brojem sugrađana, na Trgu Alije Izetbegovića svečano je proglašen i učenik generacije i položeno cvijeće na Centralno spomen obilježje. Titulu učenika generacije ponijela je maturantica srebreničke gimnazije Samra Hirkić, koja se brojnim prisutnim obratila prigodnim govorom. Po završetku ovog dijela svečanosti, proslava mature i druženje učenika i njihovih profesora, nastavljeno je u hotelu „Park“ u Srebreniku do 2 sata ujutro. (srebrenik.net)



Postrojavanje maturanata MSŠ Srebrenik

Godišnji koncert polaznika OMŠ u Srebreniku



Mirza Sitarević i Emina Emkić na takmičenju u Slobomiru

Dana 13.05.2013.godine u Kino sali Doma kulture u Srebreniku, polaznici Osnovne muzičke škole (OMŠ) u Srebreniku su održali tradicionalni godišnji koncert. Radi o događaju koji se ponavlja već 6 godina, od kada je OMŠ i formirana pri Prvoj OŠ Srebrenik, a oko 300 prisutnih roditelja i građana općine Srebrenik, su bili svjedoci jednog kvalitetnog nastupa polaznika ove škole, koji su prethodno odabrani od strane svojih nastavnika. Najviše učenika je nastupilo na klaviru, izvo-



Zajednička fotografija učesnika koncerta

đenjem brojnih Sonatina, Preludija, Etida...od najznačajnijih kompozitora klasične muzike, ali su zapažen nastup imali i učenici koji sviraju harmoniku i gitaru. Koncert je počeo i završio izvrsnim nastupom hora, u sredini koncerta je nastupio orkestar harmonikaša Osnovne muzičke škole, dok su vrijeme između popunili polaznici OMŠ od prvog do šestog razreda. Iako je ogromna većina polaznika prikazala zavidan nivo i kvalitetu sviranja na ova tri instrumenta, vrijedi istaći zapažen nastup Emine Emkić, koja ove godine završava OMŠ i koja veoma kvalitetno izvodi i složene kompozicije predviđene za Srednju muzičku školu, zbog čega je do sada osvojila nekoliko nagrada na muzičkim takmičenjima.

Obilježen Dan Prve osnovne škole Srebrenik



Najbolji učenici Prve OŠ sa direktoricom Džanić Almirom

Dana 15.05.2013. godine svečano je obilježen Dan Prve osnovne škole Srebrenik. Tim povodom u hodnicima škole održana je izložba najuspješnijih učeničkih radova, a centralni dio svečanosti upriličen je u centralnom holu Prve osnovne škole, gdje je pred općinskim načelnikom Buljubašić Sanelom, brojnim roditeljima, učenicima, nastavnicima i drugim gostima, priređen prigodan kulturno umjetnički program. Direktorica Prve OŠ Srebrenik Almira Džanić je u prigodnom govoru predstavila školu te podsjetila na brojne uspjehe koje je škola postigla u ovoj školskoj godini, posebno istakavši uspjehe iz matematike, engleskog jezika, historije, geografije, biologije, uspjehe u brojnim sportskim disciplinama..., nakon čega je podijelila nagrade najboljim učenicima ove škole kao i najboljim polaznicima Odjeljenja osnovne muzičke škole.

„Let's do it“ u Srebreniku



U Seoni je prikupljeno 160 vreća raznog otpada

U sklopu najveće volonterske akcije u BiH "Let's Do It – očistimo zemlju za 1 dan" koja je počela 18.05.2013. godine u 10 sati očišćene su brojne ilegalne deponije otpada na području grada i općine Srebrenik. Tako su, nažalost malobrojni, aktivisti očistili gradski park, dijelove oko gradskog stadiona te korito rijeke Tinje u Centru Srebrenika. U Seoni su članovi Ekološkog udruženja takođe bili vrijedni i očistili su dvije ilegalne deponije u neposrednoj blizini izvorišta i bušotine Ahmedinovac u Seoni, kao i put od Seone do Rašljeve. Sabrano je ukupno oko 160 vreća raznog otpada. Da ova akcija u Seoni bude uspješna pomoglo je i preduzeće JKP „9. septembar“ Srebrenik, koje je obezbijedilo kamion da bi se prikupljeni otpad mogao odvesti. U akciju su se uključili i mladi MZ Duboki Potok, njih oko 15, koji su očistili sve ulice u Dubokom Potoku, tribine stadiona NK „Ingram“, te autobusku stanicu u Dubokom Potoku. Rezultat akcije u Dubokom Potoku je 25 prikupljenih vreća otpada i čiste lokalne ulice. Na sličan način Udruženje mladih Tinja je očistilo teren u Gornjoj Tinji u širem području oko spomen-obilježja.

5. Kotlićijada u Srebreniku



Dobitnici nagrada na Kotlićijadi Srebrenik 2013

Dana 27.04.2013. godine, u jutarnjim satima na livadi ispred MSŠ Srebrenik, održana je 5. tradicionalna Kotlićijada u Srebreniku. Učestvovala su 23 kotlić majstora, u disciplinama: gulaš, bosanski lonac i fiš paprikaš. Oko jedan sat popodne svi kotlići su bili spremni za ocjenjivanje, nakon čega je stručni žiri, koji je brojao 4 člana, proglasio najbolje. U disciplini gulaš prvo mjesto su podijelili LD "Majevica" Srebrenik i Klub spasilaca Srebrenik, u disciplini bosanski lonac pobijedio je ŽFK "Gradina" Srebrenik, dok je u disciplini fiš paprikaš pobijedila ekipa izletišta "Ribarska priča". Poslije proglašenja pobjednika druženje se nastavilo do večernjih sati. (srebrenik.net)

Čišćenje izletišta na Ratišu

Članovi Ekološkog udruženja "Seona-Ratiš" su početkom maja 2013.g. bili vrijedni te su uspjeli očistiti reon Ratiš i prilaze platou Dovište sa strane Općine Lukavac i Općine Srebrenik. Prikupljeno je ukupno 150 vreća smeća. Njihovoj akciji u čišćenju pridružio se iz Gnojnice Elvedin Ikanović, član umjetničke Grupe Lucido i aktivista asocijacije „Zelene Staze – Green Tour“. Osnovni cilj ove akcije bio je da se počisti smeće ostalo iza nemarnih građana koji su slavili 1. maj na platou Ratiš, koji je poznat i po Dovištu te tradicionalnim dovama



Aktivisti koji su očistili reon Ratiša

muslimanskih vjernika. Prilikom prikupljanja smeća vršena je selekcija i razvrstavanje tako da se u konačnici sakupilo oko pedeset vreća pet ambalaže, dvije vreće aluminijskih limenki, te staklo i ostalo smeće. Aktivisti Eko Seona-Ratiš su ovim skrenuli pažnju da smeće nije bezvrijedno, odnosno da se prodajom sekundarnih sirovina mogu dobiti simbolična sredstva za dalje aktivnosti. Cijena otkupa plastike u BiH se kreće oko 300 KM/t. Cijena selektovane PET ambalaže u zemljama EU kreće se oko 600 eura po toni, što je gotovo četiri puta više. Aktivisti skreću pažnju vlastima da se osigura otkup prikupljene plastike po popularnijim cijenama, što će značiti znatno čistiji okoliš. Adi Mehinović član Ekološkog udruženja „Seona-Ratiš“ ističe da bi vlasti trebale subvencioniranjem otkupa, kao što je npr. u Hrvatskoj gdje država participira sa 0,5 kuna po flaši, pomoći pojedince i grupe koji vode računa o našem okolišu.

Novi dom i novi život za Snagić Ibrahima iz Murata



Ibrahim u novoj kući

Datum kojeg će se Ibrahim Snagić iz Murata posebno sjećati, biće sigurno 10. april. Poslije dugih godina samoće, izolacije, života u trošnoj i neuslovnoj kući Ibrahim je, zahvaljujući UG "Pustinjska ruža", tog dana dobio novi dom. - "Pitali smo Ibrahima da li

se slaže da mu obezbijedimo jedan stan u susjednom selu i on je sa dozom rezerve pristao. Ipak je on u svojoj, iako trošnoj kući, odrastao i proboravio svoj životni vijek. U saradnji sa nadležnim službama Općine Srebrenik Ibrahim je dobio smještaj u izbjegličkom kampu u Ahmićima, dok smo mi prazan stan uredili, opremili i obezbijedili sve što je potrebno za normalan život jednog čovjeka. Naši aktivisti su stan okrećili i uredili a zahvaljujući našim plemenitim donatorima obezbijedili smo: kuhinju, sećije, peć, tepihe, posteljine, "podmjeru" u vrijednosti od 150KM i još mnogo toga."-kažu članovi "Pustinjske Ruže", udruženja koje je do sada organizovalo i realizovalo čitav niz humanitarnih akcija i projekata, kao što je projekt hvala vrijedan "Ni jedan osnovac bez užine", koja je još uvijek u toku. (radiosrebrenik.ba)

Svečanom sjednicom obilježen Dan JU MSŠ Srebrenik



Sumedin Nišić

U amfiteatru škole svečanom sjednicom nastavničkog vijeća obilježen je Dan MSŠ Srebrenik, kojim je ujedno obilježeno i 36 godina postojanja srednjoškolskog obrazovanja na području općine Srebrenik. O ostvarenim rezultatima, ali i planovima za budućnost govorio je direktor škole Sumedin Nišić,

koji je posebno pohvalio učenike i nastavnike na izvanrednim uspjesima koji su postigli ove školske godine. Sve ovo se moglo pogledati i na kratkoj video prezentaciji koju je za ovu priliku uradila učenica Ilma Mutapčić u koordinaciji sa profesoricom Velidom Smajlović. Kako je 22. 04. i Dan planete zemlje i Ekološka sekcija škole je pripremila prigodan program. Na kraju radnog dijela učenicima koji su ostvarili plasman na Federalno takmičenje i najuspješnijim učenicima na kantonalnim takmičenjima dodijeljene su pohvale i diplome. Nakon radnog dijela izveden je i prigodan kulturno umjetnički program. Ukratko da se podsjetimo na protekla takmičenja u kojima su učenici MSŠ Srebrenik, naravno uz pomoć njihovih nastavnika, postigli velike uspjehe. U JU MSŠ Kalesija 06.04.2013. godine održano je kanto-

nalno takmičenje iz matematike. Veliki uspjeh su postigli učenici i njihovi nastavnici mentori iz MSŠ Srebrenik, tako da su se 4 učenika plasirala na Federalno takmičenje. U kategoriji I razreda Sekić Viklana je osvojila 3 mjesto, u kategoriji II razreda Čizmić Adis je osvojio 4. mjesto, u kategoriji III razreda Omerović Semir je osvojio 2. mjesto dok je u kategoriji IV razreda Gvozden Amir osvojio 3. mjesto. Na sajmu omladinskih preduzeća održanom 05.04. 2013. godine u Sarajevu, preduzeće ove škole "Lami Soft" zauzelo je prvo mjesto, u konkurenciji 120 preduzeća iz cijele BiH. JU MSŠ Srebrenik, predstavila se sa 8 preduzeća, a preduzeće "Lami Soft" kao sveukupni pobjednik je nagrađeno sa 7-dnevnim druženjem u Sutomoru, a pod pokroviteljstvom BIP-a, fondacije iz Norveške. Preduzeće su vodili učenici Sead Ordagić, Kemal Dedić, Sadmir Mašić i Haris Čajić. OP „LamiSoft“ se bavi izradom marketinškog materijala kao što su akreditacije, vizit kartice, CD/DVD design, multimedijalni katalozi, naljepnice, web design, online aplikacije i ostali marketinški materijala za promociju raznih vrsti firmi. Iskrene čestitke za međunarodno predstavljanje škole u Sutomoru, gdje će učestvovati pobjedničke ekipe iz BiH, Srbije, Hrvatske i Crne Gore. Na kantonalnom takmičenju iz njemačkog jezika, održanom u Tuzli, 06.04. 2013. godine učenici MSŠ Srebrenik su takođe postigli izuzetan rezultat. Tako je Pedljić Zerina dijelila 2. mjesto a Joldić Tarik dijelio je 3. mjesto na B2 nivou Njemačkog jezika, dok je Močić Amela dijelila 4. mjesto a Bećirović Lejla 8. mjesto na istom takmičenju ali na A2 nivou Njemačkog mjeseca. Vrijedi istaći i uspjeh učenika JU MSŠ Srebrenik na kantonalnom takmičenju iz historije, održanom 13.04.2013. godine u Tuzli. Učenica IV razreda gimnazije Hirkić Samra, osvojila je 1. mjesto, dok je učenica III razreda gimnazije Skopljak Elma zauzela visoko 4. mjesto. Čestitke učenicima i nastavnicima koji su svojim radom omogućili ovako visok plasman škole.

Mektepsko takmičenje MIZ-e Srebrenik za 2013. godinu

Dana 21.04.2013.godine u prostorijama II Osnovne Škole u Srebreniku održano je mektepsko takmičenje za polaznike mektepske nastave na nivou Medžlisa islamske zajednice Srebrenik. Prema ustaljenim pravilima i propisima takmičenje se odvijalo u tri kategorije i to:

- 1)Test općeg islamskog znanja,
- 2)Kiraet za uzrast do 12 godina,
- 3)Kiraet za uzrast od 12-15 godina.

U kategoriji test općeg islamskog znanja učestvovala su po dva kandidata iz svakog džemata (74 takmičara), a poredak je sljedeći: 1)Emkić Emina (džemat Kiseljak), 2)Hasić Ajka (džemat Špionica), 3) Kulović Elma (džemat Bare), 3)Bešić Haris (džemat Falešići), 4)Ibrić Medina (džemat Špionica), 5) Mujčinović Amra (džemat Čehaje),...

U kategoriji kiraet (uzrast do 12 godina) učestvovao je po jedan kandidat tj. 37 takmičara a poredak je sljedeći: 1)Joldić Faruk (džemat Brda), 2)Ibrahimović Smajo (džemat Zahirovići), 3)Najra Mohamed Gaber Barakat (džemat C. Srebrenik), 4)Begunić Mirsad (džemat Čehaje), 4)Jukić Emra (džemat Ježinac),...U kategoriji kiraet (uzrast od 12 do 15 godina) učestvovao je po jedan kandidat tj. 37 takmičara a poredak je sljedeći: 1)Avdić Aida (džemat Špionica), 2)Joldić Ensar (džemat Brda), 3)Sara Mohamed Gaber Barakat (džemat C. Srebrenik), 4)Begunić Lejla (džemat Čehaje), 5)Žilić Adna (džemat Falešići),... Zbrajanjem bodova svih kandidata dobijen je i ukupan ekipni poredak kako slijedi:1) Džemat Čehaje, 2)Džemat Brda, 3)Džemat Špionica, 4)Džemat Kiseljak, 5)Džemat C. Srebrenik,...Osim u navedenim kategorijama proglašeno je i pet najuspješnijih muallima: 1)Jasmin-ef Begunić, 2)Ramiz-ef Joldić, 3)Refik-ef. Hodžić, 4)Ismet-ef. Odošić, 5)Emir-ef Brašnjčić,... Takmičenje je počelo u 9 sati a završeno je do 13 sati. Proglašavanje pobjednika, dodjelu diploma i uručivanje novčanih nagrada izvršili su glavni imam Refik -ef Hodžić i predsjednik Medžlisa



Prvoplasirana ekipa Džemata Čehaje

Mevludin-ef Joldić. Na samom proglašavanju pobjednika iz Kiraeta do 12 godina i Kiraeta 12-15 godina ovogodišnji pobjednici su počastili prisutne učenjem odlomaka iz Kur'ana. Na kraju prisutnima se obratio glavni imam Refik-ef, čestitao pobjednicima, svim učesnicima se zahvalio što su uzeli učešće na ovogodišnjem mektepskom takmičenju, poželio bolje rezultate u daljem radu i pozvao sve polaznike da budu redovni u svojim mektebima. Najuspješnijim takmičarima i muallimima su udijeljene prigodne diplome te novčane nagrade. Ekipu koja će predstavljati MIZ-e Srebrenik na mektepskom takmičenju na nivou Muftijstva čine: Emkić Emina (test općeg islamskog znanja), Joldić Faruk (kiraet do 12 godina), Avdić Aida (kiraet 12-15 godina), Bošnjaković Emina (vjeronauka za 8 razrede devetogodišnjih osnovnih škola) i Hodžić Sedina (vjeronauka za 9 razrede devetogodišnjih osnovnih škola).

Adeli Joldić prvo mjesto na turniru u Mostaru



Joldić Adela sa peharom i diplomom za prvo mjesto

Jedna od najvećih nada našeg tenisa, trinaestogodišnja Adela Joldić iz Lušnice, općina Srebrenik, osvojila je svoj prvi Tenis Europe turnir, koji se početkom juna 2013. godine odigrao u Mostaru. Adela je bila treća nositeljica turnira i opravdala je ukazano povjerenje. Da je igrala odlično cijeli turnir pokazuje i činjenica da nije izgubila niti jedan set. Nakon ovog turnira Adela je otišla na zasluženi odmor, nakon čega je očekuje još mnogo turnira ove godine. Nadamo se sa ovakvim i još boljim rezultatima naše sugrađanke i u buduću. (srebrenik.net)

Buljubašić Hasib pobjednik u tricama



Buljubašić i Kaltak

Dana 30.08.2013.g. u organizaciji Škole sporta „Silver Kings“ Srebrenik održan je tradicionalni turnir „Streetball i trice 2013“. Na renoviranom gradskom poligonu u Srebreniku brojni ljubitelji košarke su uživali u prijateljskim utakmicama, tako su pioniri Silver Kingsa pobijedili Gradačac sa 32-22, kadeti Silver Kingsa su pobijedili vršnjake iz K.K. „Milenijum“ sa

45-37. U glavnom dijelu večeri pristupilo se takmičenju u šutiranju trica. Po prvi puta nastupila je i takmičarka Azra Bećirović, bivša reprezentativka. Nakon prvog kruga najbolji rezultat je postigao Almedin Salihović iz Srebrenika sa 12 poena. U finale su se ipak plasirala dvojica najboljih, Hasib Buljubašić i Kenan Kaltak. Hasib Buljubašić je na kraju odnio pobjedu i tako dobio novčanu nagradu od 300 KM i priliku da brani titulu naredne godine. Drugoplasirani Kenan Kaltak dobio je novčanu nagradu od 100 KM. (srebrenik.net)

Karatistima „1. Marta“ medalje u Bugojnu, Bijeljini, Usori, Šapcu....

Dana 26.05.2013.godine, u organizaciji Karate kluba "Futura" Bugojno, održan je 10. Internacionalni karate turnir "Futura kup 2013". Na takmičenju je nastupilo 200 takmičara iz 15 klubova. Takmičenje se odvijalo na 3 borilišta u disciplinama kate i borbe pojedinačno i ekipno za uzrasne kategorije do 21 godine. Karate klub "1. Mart" Srebrenik je nastupio sa 20 takmičara i proglašen je za najuspješniju ekipu takmičenja sa osvojenih 20 zlatnih, 8 srebrenih i 5 bronzanih medalja. Najzapaženije rezultate u ekipi 1. Marta su postigli Aldin Karić sa osvojene 4 medalje i Elma Muratović sa osvojenih 5 medalja. I na takmičenjima u Bijeljini, Usori, u Šapcu i Srebreniku takmičari 1. Marta su takođe osvojili brojne medalje i bili među najuspješnijim ekipama.



Detalj sa turnira u Bugojnu

Regionalni karate turnir "Srebrenik 2013"



Detalj sa turnira u Srebreniku

Karate klub "Srebrenik" je i ove godine bio uspješni domaćin tradicionalnog regionalnog karate turnira "Srebrenik 2013" koji se održao 26.05.2013.g. u sportskoj dvorani u Srebreniku. Na turniru je nastupilo 560 takmičara iz 21 kluba. Najuspješniji klub na turniru je bio KBS „Tuzla-Sinbra“ iz Tuzle. Drugo mjesto u ukupnom plasmanu zauzeo je KK „Zmaj“ - Gradačac, dok je domaćin ovog turnira, KK „Srebrenik“ zauzeo treće mjesto. Četvrto mjesto pripalo je KK „Konjuh“ iz Živinica. Karatisti KK „Srebrenik“ su se okitili sa 8 zlatnih, 10 srebrenih i 21 bronzanom medaljom. Najuspješnijom takmičarkom turnira proglašena je Elma Softić, članica KK „Srebrenik“, koja se okitila sa dvije zlatne i jednom srebrenom medaljom. Prema riječima gostiju iz Tuzle, Gradačca, Gračanice, Živinica i drugih gradova, karate klub „Srebrenik“ se pokazao kao izuzetno dobar organizator, što dovoljno govori i činjenica da je ovo najmasovniji karate turnir regionalnog karaktera (po odzivu takmičara i publike) koji je organizovan na području Tuzlanskog kantona u proteklih 5 godina. (radio srebrenik)

Velemajstor Zoran Jovanović prvi na 9. Memorijalnom međunarodnom šahovskom turniru Džafer Hogić

Dana 15.06.2013. godine u slopu obilježavanja 21. juna, Dana općine Srebrenik, šahovski klub „Srebrenik“, u Srebreniku je održao 9. Memorijalni međunarodni šahovski turnir „Džafer Hogić“. Šahovski turnir je proglasio otvorenim općinski načelnik Buljubašić Sanel. Učešće na turniru uzeo je 101 takmičar iz Hrvatske, Srbije, Danske, Sjedinjenih Američkih Država i BiH. Iako je po svom sastavu bio nešto slabiji zbog podudaranja termina turnira sa početkom ekipnog prvenstva BiH u Premijer ligi, ipak su na ovom turniru učestvovala 2 velemajstora, 3 međunarodna majstora i 2 fide majstora, odnosno 39 igrača sa fide rejtingom. Posebno raduje podatak da su na turniru učestvovala 3 djevojčice i 5 dječaka. Turnir se igrao po švicarskom sistemu od 9 kola uz tempo igre 15 minuta po igraču, a ulogu glavnog favorita je opravdao Zoran Jovanović, velemajstor iz Hrvatske, koji je osvojio prvo mjesto sa 7,5 poena. Po 7,5 poena, ali sa nešto slabijim dodatnim kriterijumima, osvojili su međunarodni majstori Nenad Mrkonjić iz Hrvatske i Zoran Runić iz BiH koji su zauzeli drugo i treće mjesto. Pored 10 redovnih nagrada za desetoricu prvoplasiranih takmičara organizator turnira je obezbijedio i 7 specijalnih nagrada koje su osvojili šahisti iz BiH. Nadina Mahmutović je sa 5 poena osvojila nagradu za najbolju šahistkinju, a Šemso Požegić sa 4,5 poena nagradu za najboljeg mladog igrača do 20 godina. Nagradu za najbolje plasiranog igrača bez fide rejtinga osvojio je Husein Nurikić sa 6 poena, a najbolji veteran je sa 5 poena bio Arif Grebović. I predstavnici šahovskog kluba



Prvoplasirani Zoran Jovanović, velemajstor iz Hrvatske

„Srebrenik“ su postigli zapažene rezultate, a tri nagrade su osvojili Zehrudin Zahirović sa 6,5 poena-najbolje plasirani domaći igrač, drugi je bio Adis Mumanović sa 6 poena, a treće mjesto je zauzeo Ševal Muslimović sa istim brojem poena. Kako su naveli organizatori turnira, članovi ŠK „Srebrenik“, veoma su počastvovani pohvalama koje su im uputili šahisti-učesnici turnira, koji su istakli da ovaj turnir ima „dušu“, a taj detalj će im svakako biti podstrek da učestvuju i na narednom 10. Memorijalnom međunarodnom šahovskom turniru „Džafer Hogić“.

Trijumf srebreničana u odbojci na pijesku



Alen Harčinović i Nedim Slanjankić

Dana 13.08.2013.g. u posavskom Novom Gradu održan je jedan od najelitnijih turnira u odbojci na pijesku. O kvalitetu turnira dovoljno govori podatak da su na njemu nastupile velike ličnosti iz odbojkaškog sporta, kao što su: - Cimafej Žukovski, tehničar hrvatske reprezentacije i igrač italijanske Ravene; -Sandro Venijer i Jegor Žukovski, licencirani igrači odbojke na pijesku i osvajači posljednjeg turnira u Vrsaru 2013.g.; -Sead Omeragić "Šojka", prvi kapiten reprezentacije BiH, te profesionalni igrač odbojke na pijesku; -Drago Teodorović, igrač brčanskog Jedinstva i pobjednik velikog broja turnira u odbojci na pijesku kao i veliki broj drugih kvalitetnih igrača. Nakon 12 sati vrhunske odbojke, prvo mjesto su osvojili momci iz Srebrenika: Alen Harčinović i Nedim Slanjankić, igrači OK Gradina-Herceg Srebrenik, koji su ovaj put nastupali pod imenom sponzora "Mlin Majić". Drugo mjesto zauzela je ekipa iz Brčkog, a treće ekipa iz Zagreba Žukovski-Venijer. Sve pohvale pobjednicima turnira, Nedimu i Alenu, koji su dokazali da se u Srebreniku igra vrhunska odbojka na pijesku.

Silver Kings viceprvaci Euroregion lige za sezonu 2012/13

U nepune tri godine od osnivanja, K.K. Silver Kings-škola sporta iz Srebrenika, je postao respektibilan košarkaški klub. U konkurenciji klubova iz Hrvatske, Srbije i BiH (ekipe Vinkovci, Županja, Loznica, Ljubovija, Brčko DC, Sloboda Tuzla, Milenium Živinice i 2 tima iz Bijeljine), jedini klub koji je uspio da u ovoj sezoni uđe u finale obje muške konkurencije (seniori i pioniri) u ovoj sezoni Euroregion lige. Posljednji uspjeh se dogodio u Zvorniku 15.06.2013. godine gdje su Silver Kingsi postali viceprvaci Euroregion lige za sezonu 2012/13. Čestitke ekipi i menadžmentu na ovom velikom uspjehu. (srebrenik.net)



Ekipa "Silver Kingsa" u Zvorniku